

Siunnersuummut nassuiaatit

Nassuiaatit nalinginnaasut

1. Aallaqqaasiut

Akileraaruserinermik ingerlatsineq pillugu Inatsisartut inatsisaanni allannguutiniq assigiinngitsunik, tassungalu ilanngullugu meeqqanut katissimallugulu apparisamat akiliutiniq aalajangersaanissaq siunertaralugu Kalaallit Nunaanni akileraartartut pillugit paasissutissanik akileraaruseriffik nunani avannarlerni oqartussaasunut avitseqateqarsinnaanera pillugu piginnaatitsissummik aamma killeqarfiit akimorlugit aaqqissuussinernik immikkut siunnersortit pisut ilaanni nalunaaruteqarsinnaanera pillugu malittarisassanik erseqqinnerusunik Naalakkersuisut aalajangersaasinnaanerannut piginnaatitsissummik siunnersuut imaqarpoq.

Illuatungeriit akornanni isumaqatigiittoqanngitsillugu Kalaallit Nunaanni meeqqanut katissimalluguluunniit apparisamat akiliutit pillugit aalajangersaanissaq allannguinnissarluunniit pillugu suliat pillugit eqqartuussiviit aalajangiisassapput. Ilaatigut illuatungeriit isertitatigut atugaat pillugit paasissutissat tunngavigalugit akiliutit aalajangersarneqartarput. Paasissutissat taakku ullumikkut suliami illuatungeriinnit pissarsiarineqartarput, pisulli ilaanni illuatungeriit paasissutissanik naammattunik nassitsineq ajorput imaluunniit suliap ingerlanerani kingusissorujussuakkut imaluunniit arlaleriarlutik nukingisaarneqarnermikkut aatsaat paasissutissanik nassitsisarlutik. Pisuni illuatungiusup akilersuisussap suliap kinguarsarnissaanik siunertaqarpat tamanna periarfissamik ammaassivoq. Taamaattoqarneratigut illuatungerisaq aningaasaqarnikkut akiliissuseqannginnerusoq eqqornerlunneqassaaq, eqqartuussivik taamaattoqarneratigut aalajangiisinnaassuseqassanngimmat.

Inatsisit atuuttut malillugit akileraaruseriffiup isertitat pillugit paasissutissanik ingerlatitseqqinnissaanut inatsisitigut pisussaaffeqanngilaq imaluunniit paasissutissanik taamaattunik Naalagaaffiup Sinniisoqarfiata pissarsiniarnissaanut inatsisitigut ersarissumik tunngavissaqarnani.

Tamanna pissutigalugu akileraaruseriffiit eqqartuussiviillu sulianik ingerlatsinerminnut atatillugu aningaasaqarnikkut paasissutissaataannik pissarsiniarnissani Naalagaaffiup Sinniisoqarfiata qinnutigaa. Tusarniaanerup nalaani, Nunani Avannarlerni Ministerit siunnersuisooqatigiit Killeqarfinni akimmiffinnut siunnersuisooqatigiinni ilaasortap Naalagaaffeqatigiinneq qaangerlugu assingusunik suliaasaqartarsimalluni oqaatigaa, tamatumalu nunani avannarlernut atuutilernissaanut siunnersuutigalugu.

Tamatuma kinguneranik akileraaruseriffiup nunani allani paasissutissanik oqartussanut tunniussisarnera pissarsisarneralu pillugu malittarisassat erseqqissarneqarput. Siunnersuummi akileraaruseriffik Aningaasatigut peqquserluutiniq Hvidvaskningssekretariatimit

nalunaarutinit paasissutissanik pissarsisarnissaanut aamma tunniussisarnissaanut piareersaaneq immikkut pineqarpoq.

Nunani oqartussaaffeqarfinnilu amerlanerpaani akileraartarnermut namminneq inatsisitit pingaarnertut aalluppaat. Suliffeqarfiit nunani arlalinni ingerlatallit siunnersortiminnit ikiorneqarlutik nunani assigiinngitsuni akileraartarnermut malittarisassat eqqumaffigalugit ingerlataminnik aaqqissuussinermikkut akileraarutinit akiligassaminnik pitsannorsaasinnaannaannut tamanna ilaatigut periarfissiivoq. Suliffeqarfiit taamannak iliorpata tamatuma kingunerissavaa nunat akileraarutinit iluanaarutaat amerlaqataannik annikillissammata. Killeqarfiit akimorlugit ingerlatat qanoq malinnaaffigineqarsinnaanerit pillugu Europæiske Union aamma OECD siunnersuuserput. Kalaallit Nunaannut atatillugu paasissutissanik avitseqatigiinnissaq pillugu suleqatigiinnissaq soqutiginaateqassaaq. Paasissutissat suliffeqarfiit killeqarfiit akimorlugit ingerlataat pillugit aqutsisoqarfinnit paasisaqarfiginissaannut peqataaqataasinnaapput.

Akileraarutikinnerusunut nuuttarnerit ilisimasaqarfiginerisigut oqartussaasut akileraartarnikkut periutsimut peqquserluuteqarfiusumut qisuariarsinnaassapput aammalu inatsisiliornikkut atorluarneqaratarsinnaasut matussuserlugit imaluunniit annaasaqarfiusinnaasunik siunnerfilimmik naliliisinnaassallutik aammalu akileraarutini kukkunerisuiisnaassallutik. Taamaattumik akileraarutikinnerusunut nuuttarnerit pillugit paasissutissat attuumassuteqartut pillugit siunnersortinit nalunaarfigineqarnermigut akileraaruseriffiup pissarsinissaa naapertuuppoq. Taakkua saniatigut, Akileraaruserinermik ingerlatsineq pillugu Inatsisartut inatsisaata allangortinneqarneranik siunnersuutip kinguneranik ingerlatseqatigiiffiit il. il. akileraarutinit akiliutaagallartut eqqunneqarnerata kingunerisaanit inatsimmi iluarsisassat iluarsineqarput.

2. Siunnersuummi immikkoortut pingaarnertit

2.1 Meeqqanut katissimallugulu aapparissamut akiliutinik aalajangersaanissamut il.il. atugassatut aningaasaqarnikkut paasissutissanik naalagaaffimmi oqartussanut ingerlatitseqqinneq.

Isertitat pillugit paasissutissanik ingerlatitseqqinneq akileraaruserinermik ingerlatsineq pillugu Inatsisartut inatsisaanni, Pisortat ingerlatsineranni suliassat suliarineqartarnerat pillugu Inatsisartut inatsisaanni (suliassat suliarineqartarnerat pillugu inatsit) aamma inunnt paasissutissat pillugit peqqussummi maleruagassiorneqarpoq.

Isertitat pillugit paasissutissat inunnt paasissutissat pillugu peqqussummi paasissutissat nalinginnaasumik isertuussassat pillugit paasissutissat pillugit § 6-imi ilaatinneqarput. Taamaattumik oqartussaasup suliaminik ingerlatsinissaminut, tassungalu ilanngullugu aalajangiinissaminut paasissutissat pisariaqartippagit isertitat pillugit paasissutissat ingerlateqqinneqarsinnaapput. Taamaalluni inunnt paasissutissat pillugit peqqussummi malittarisassat ingerlatitseqqinnissamut akimmisaartitsinngillat.

Pisortani oqartussaasunut allanut ingerlatitseqqittoqarsinnaanersoq aammalu ingerlatitseqqinnissamut pisussaaffik pillugu apeqqut suliaassat suliarineqartarnerat pillugu inatsimmi §§ 28-33-mi maleruagassiorneqarpoq.

Inuit pillugit paasissutissanik ingerlatitseqqinneq innunut paasissutissat pillugit peqqussummi ilaatinneqartoq pineqarpat peqqussummi malittarisassat suliaassat suliarineqartarnerat pillugu inatsimmi malittarisassanit salliutinneqassapput. Inuit pillugit paasissutissat paasissutissanik elektroniskiusumik suliaqarnermi atugassanik tamakkiisumik ilaannakortumilluunniit atorneqassatillugit innunut paasissutissat pillugit peqqussut atuutissaaq.

Oqartussaasoq paasissutissanik ingerlatitseqqinnissamut *pisussaaffeqarneranut* apeqqut suliaassat suliarineqartarnerat pillugu inatsimmi § 32-mi maleruagassiorneqarpoq. Taamaakkaluortoq Namminersorlutik Oqartussani aqutsinermut oqartussaasut kisimik suliaassat suliarineqartarnerat pillugu inatsimmi ilaatinneqarput, taamaattumillu Danmarkimi Savalimmiuniluunniit imaluunniit nunani allani ingerlatsinermik oqartussaasunut ingerlatitseqqissinnaaneq aalajangersakkatigut maleruagassiorneqarnani.

Tamanna malillugu paasissutissat oqartussaasup allap sulineranut pisariaqartinneqarpata akileraaruseriffik paasissutissanik taamaattunik ingerlatitseqqinnissamut piginnaatitaavoq pisussaataitananili.

Naalagaaffiup Sinniisoqarfiata paasissutissanik taamaattunik akileraaruseriffimmit pissarsinarsinnaaneranut katinneq avinnerlu pillugit inatsit Kalaallit Nunaannut atuutsinneqartoq pillugu peqqussummi inatsisitigut ersarissumik tunngavissaqanngilaq. Taamatuttaaq Kalaallit Nunaata nunani avannarlerni suleqatigisartagaasa paasissutissanik taamaattunik piniarsinnaaneranut, tusarniaanerup nalaani erseqqissaatigineqartutut, inatsimmi ersarissumik tunngavissaqalersitsisussamik isumaqatigiissuteqartoqanngilaq.

Assersuutigalugu Naalagaaffiup Sinniisoqarfiani eqqartuussivimmilu meeqqanut katissimallugulu aapparisanut akiliutit pillugit suliat suliarineqarneranni atugassatut illuatungeriit aningaasaqarnikkut atugaat pillugit paasissutissat akileraaruseriffimmit ingerlateqqissinnaanerata inatsisitigut tunngavissaa siunnersuutikkut qulakkeerneqassaaq. Siunnersuummi aamma ilaatinneqarput nunani avannarlerni oqartussaasut allat, taamaattumillu Naalagaaffiup Sinniisoqarfiata saniatigut nunani avannarlerni oqartussaasut tamanna pillugu aalajangiisartut ingerlatitseqqissinnaanerata ilaatinneqarsinnaalluni.

Suliani meeqqanut katissimallugulu aapparisanut akiliutinut atatillugu akiliutinik pissarsisartup aammalu akiliutinik akiliisartup isertitaat pillugit paasissutissanik ingerlatitseqqissinnaaneq aalajangersakkami ilaatinneqarpoq.

2.2 Killeqarfiit akimorlugit aaqqissuussinernut nalunaaruteqartarnissamut piginnaatitaaffimmut toqqammavimmik aalajangersaaneq.

Immikkut siunnersortit, soorlu eqqartuussissuserisut, kukkunersiuisut siunnersortilluunniit allat killeqarfiit akimorlugit aaqqissuussinerit paasissutissanik nalunaaruteqarnissamut pisussaaffilerneqarnissaat pillugu malittarisassanik Naalakkersuisut aalajangersaasinnaanerit aalajangersagassatut siunnersuutigineqartuni periarfissinneqarpoq. Malittarisassatut atuutsinneqalertussat Den Europæiske Unionip malittarisassaanut (DAC6) aammalu OECD-p periusissatut malittarisassaanut eqqaanassasut, taamaattorli Kalaallit Nunaanni pissutsinut naleqqussarneqassasut, naatsorsuutigineqarpoq. Taamaalilluni nunat allat malittarisassanut taakkununga assingusunik inatsimmi atuutsitsilersimasut paasissutissanik attuumassuteqartunik avitseqatiginissaat ajornannginnerulissaaq, soorlutaaq nunani allani suleqatit suleqatigineqarnerat aqqutigalugu siunnersortit susassaqtut malittarisassat qanoq malinneqarsinnaanerit paasisaqarfigisinnaagaat.

Directive on Administrative Co-operation 6, DAC 6-itut taaneqarajuttoq, tassaavoq nalunaaruteqartussaataaernerit atatillugu killeqarfiit akimorlugit aaqqissuussinernut akileraartarnerit suliaasaqarfirmut paasissutissanik ingerlaannartumik avitseqatigiinnissamut pisussaataaffimmi allaffissornikkut suleqatigiinnissaaq pillugu EU-mit malittarisassiaq. Malittarisassiami aallaavigineqartoq tassaavoq killeqarfiit akimorlugit aaqqissuussinerit suulluunniit pillugit nalunaarusiortoqartarnissaa, aammalu OECD-p malittarisassiaa CSR-ip malittariassaanik unioqqutitsinerit tunngassuteqarluni (Akileraaruserinermik ingerlatsineq pillugu Inatsisartut inatsisaanni § 35 a aammalu Aningaasatigut kontunik nunanut attuumassutilinnik kinaassutsimik uppersaasarneq nalunaaruteqartarnerlu pillugit Namminersorlutik Oqartussat nalunaarutaat nr. 15, 24. oktober 2019-imeersoq).

Akileraarutikinnerusunut nuuttarnerni oqartussaaffeqarfiit arlallit ilaagajupput. Taamaattumik aaqqissuussinerit taamaattut pillugit paasissutissanik nunanut allanut avitseqateqarsinnaaneq pitsaasunik allanik nassataqassasoq naatsorsuutigineqarpoq.

Akileraarutikinnerusunut ilaatigut marloriaammik ilanngaasiinermik nassataqarsinnaavoq, assersuutigalugu nunami ataatsimi aningaasartuutip nunani marlunni isertitanik akileraarutaasussaataasunik nalunaarsuinermit ilanngaatigineqarnerani. Tamanna aamma marloriaammik akileraartussaataaanginnerusinnaavoq, taamaattoqarnerani isertitat akileraaruserneqartussaataasut nunani pinngorfimmini nunamiluunniit angerlarsimaffimmi akileraaruserneqanngitsoorfigisaat.

Akileraarutikinnerusunut nuuttarnerni malittarisassat saniatigut aaqqissuussinerit CRS-ip nalunaarutaanik malinninnginnermut atorneqartut pillugit siunnersortit nalunaaruteqarnissaannut pisussaaffiliisut atuutsilernissaannut aamma periarfissiisoqarpoq.

Killeqarfiit akimorlugit ingerlatanik paasissutissanik pissarsiniarnermut nakkutilliinermullu atatillugu CRS-imit paasissutissat Akileraartarnermut Aqutsisoqarfiup sulinerani sakkussaapput pingaarutillit. Inuit suliffeqarfiilluunniit taama nalunaaruteqarnissaq piaaralutik avaqqunniarsarippassuk tamanna Akileraartarnermut Aqutsisoqarfiup suliaanut akimmisaartitsissaaq aammali Akileraartarnermut Aqutsisoqarfiup suleqatigisaminut paasissutissanik eqqortunik avitseqateqarsinnaanginneranik nassataqassalluni.

Inatsisip oqaasertai kiisalu OECD-p allalluunniit inatsisaasa atuutsilernerat malinneqarnerallu pillugit Kalaallit Nunaanni piffissap ilaani naliliisoqarnissaa naatsorsuutigineqartariaqarpoq.

Inatsisip malitsinniarnera eqqarsaatigalugu Kalaallit Nunaanni inatsisitigut tunngavigineqartut annikitsuaraapput, taamaattumillu malittarisassat unioqquatinneqarneranni pillaatitut aalajangersakkat malitsinniarneqarnerat pillugu periutsit assersuutinik saqqummiussinissaq piuminaassasoq naatsorsuutigineqarpoq.

Kalaallit Nunaanni inatsisitigut periutsit annikinnerat aammalu nunani tamalaani naliliinernik ingerlatsisoqalernera eqqarsaatigalugit pineqaatissiinissamut qaffasissutsit atorneqarsinnaasut ilaat matuma kinguliani eqqartorneqarput. Qaffasissutsit nassuiaatigineqartut suliassaqarfimmi danskit inatsisaannut nassuiaatini oqaatigineqartunut naapertuupput.

Ataatsimut isigalugu pisuni paasissutissanik eqqunngitsunik paatsuunganartunilluunniit tunniussisoqartillugu imaluunniit nalunaaruteqanngitsoortoqartillugu akunnermiliuttut nalunaaruteqartussaataitanermik unioqquitsineranni akiliisitaassutsit annertussusissaa iluserititaq imaattoq malillugu aalajangersarneqarsinnaanersoq isumaliutigineqarsinnaavoq inuit inatsisilluunniit malillugit inuttut isigineqarsinnaasut nalunaaruteqartussaataitanermut nalunaarsuinissamullu pisussaataitasut aningaasaqassusiat malillugu immikkoortitanut tallimanut agguataarneqarlutik, aammalu immikkoortitani tamani akiliisitsissutaasussap tunngaviumik annertussusissaa piumasaqaataalluni, taamaalilluni immikkoortitani tamani suliffeqarfimmut anginernut akiliisitsissutit procentiat malillugu annertusiartuaartumik ilassuserneqarlutik kaaviiartitat tamarmiusut apeqqutaatillugit tunngaviumik annertussuseritineqartut (50.000 kr.) 50 pct.-iannit 700 pct.-iannut qaffatsikkiartuaarneqarluni.

Akunermiliuttunut immikkoortitsinerup ima inissinneqarnissaa siunnersuutigineqarpoq:

	Suliffeqarfiit mikinerit	Suliffeqar- fiit akunnattu- mik angissusillit	Suliffe- qarfiit angisuut A	Suliffe- qarfiit angisuut B	Suliffeqarfiit angisoorujussuit
Kaaviiartitat tamarmiusut	≤ 50 mio. kr.	> 50 mio. kr. ≤ 100 mio. kr.	> 100 mio. kr. – ≤ 1 mia. kr.	> 1 mia. kr. ≤ 10 mia. kr.	> 10 mia. kr.
Tapiliussat	Tapiliussaqaqngilaq	+ 50 pct.	+100 pct.	+300 pct.	+700 pct.
Akiliisitsissutit annertussusiat	50.000 kr.	75.000 kr.	100.000 kr.	200.000 kr.	400.000 kr.

Pisuni akileraartartoq nalunaaruteqartussaataatillugu aammalu akileraartartoq eqqunngitsunik paasiuminaatsunillu paasissutissiitillugu imaluunniit akileraartartoq nalunaaruteqanngitsillugu akiliisitsissutit annertussuserititap akunermiliuttunut atuuttussap affaanik akiliisitsissutissaq annertussusilerneqassasoq siunnersuutigineqarpoq.

	Suliffeqarfiit mikinerit	Suliffeqar- fiit akunnattu- mik angissusillit	Suliffe- qarfiit angisuut A	Suliffe- qarfiit angisuut B	Suliffeqarfiit angisoorujussuit
Kaaviiartitat tamarmiusut	≤ 50 mio. kr.	> 50 mio. kr. ≤ 100 mio. kr.	> 100 mio. kr. – ≤ 1 mia. kr.	> 1 mia. kr. ≤ 10 mia. kr.	> 10 mia. kr.
Tapiliussat	Tapiliussaqaqngi- laq	+ 50 pct.	+100 pct.	+300 pct.	+700 pct.
Akiliisitsissuti t annertussusiat	25.000 kr.	37.500 kr.	50.000 kr	100.000 kr.	200.000 kr.

Taamaalilluni akileraartartut ima katiterneqarnerisa agguataarneqarnissaat siunnersuutigineqarpoq:

Akileraartartoq inuussutissarsiummik ingerlataqarnani inuuppat, taamaalillunilu kaaviiartitaqanngippat akiliisitsissutip tunngaviummik annertussusia 25.000 kr.-ussaaq, akileraartartut inuussutissarsiummik ingerlataqartut akiliisitsissutaata qaffasissusianut naapertuuttoq.

Tamatuma saniatigut nalunaaruteqarnissamut piffissarititanik malinninnginnermut akiliisitsissutit tunngaviusumik qaffasissusissaanik atuutsitsisoqalissasoq siunnersuutigineqarpoq, taamaalilluni akunnermiliuttoq unioqqutitsisuuppat akiliisitsissut aallaaviatigut 50.000 kr.-nik appasinnerunani aammalu akileraartartoq unioqqutitsisuuppat 25.000 kr.-nik appasinnerunani.

Akiliisitsissutissat annertussusii nassuiaatigineqartut allaffeqarfiup unnerluussisussaataasunut inassuteqaateqarsinnaanermut atugassaatut najoqqutarineqarnissaat siunertarineqarpoq aamma suliffeqarfinnut angissusii apeqputaatinnagit tamanut akiliisitsissutit sunniuteqarluarnissaat, pissutsinut naapertuunnissaat anusinngorsaataanissaallu qulakkiissallugu. Immikkoortitani tamani akiliisitsissutit tunngaviusumik annertussutitut siunnersuut pineqarpoq aammalu aaqqissuussineq pineqartoq malillugu akileraarutitigut iluanaarutissatut naliliissut aammalu nalunaaruteqartussaataasup aaqqissuussinermut iluanaarutigisinnaasai aallaavigalugit akiliisitsissut aalajangersarneqartariaqarpoq.

Suliami pisuni ataasiakkaani tamani eqqartuussiviit aalajangersimasumik naliligaat tunngavigalugu pineqaatissiissutissaq aalajangerneqartariaqarpoq aammalu pinerluttulerinnermut inatsimmi kapitali 24-mi pineqaatissiissutissat aalajangersarneqarnerat pillugu nalinginnaasumik tamatumunnga malittarisassat naapertorlugit suliami aalajangersimasumi annikillissutaasinnaasunik pissutissaqarpat akiliisitsinerup annertussusaa qummut ammulluunniit sammisumik avaqqunneqarsinnaalluni. Misiligutitut suliat arlallit ingerlanneqarnerisigut akiliisitsissutissap annertussusissaa eqqartuussivinni aalajangersarneqarpat suliat akileraaruseriffimmi allaffissornikkut naammassineqarsinnaassapput, tak. isertitanit akileraarutitut inatsimmi § 82.

2.3 Nunani allani akileraartarnermut oqartussanik il. il. suleqateqarneq

Siunnersuutigineqarpoq, akileraaruseriffiup qallunaat, savalimmiormiut nunanilu allani oqartussanut paasissutissanik ingerlatitseqqissinnaanera pissarsisarsinnaaneralu pillugu erseqqissaasoqassasoq.

Aalajangersagaq siunnersuutigineqartoq suleqatigiinnernik, akileraaruseriffiup ullumikkut imaluunniit siunissami Danmarkimi, Savalimmiuni nunaniluunniit allani akileraartarnermut oqartussaasunik isumaqateqarfigisinnaasaannik ilaqarpoq. Siunnersuummut Hvidvaskningssekretariatimit paasissutissanik akileraaruseriffiup pissarsisarnissaanik aqutissiuinissamik kissaateqarneq immikkut tunngavigineqarpoq.

Immikkut aningaasatigut aamma Nunani tamalaani peqquserlunnermut Naalagaaffiup unnerluussisuata ataani, Hvidvaskningssekretariatimit, suliffeqarfinit inunnillu ilisimannittunit imaluunniit pasitsaassaqaarsimasunit, nuussineq aningaasanik malunnarunnaarsaasarneq imaluunniit peqqarniisaarnianik aningaasalersuinnermut attuumassuteqarnerisigut attuumassuteqarsimanersorluunniit pillugit nalunaarutitigut

katersisarpoq. Aningaasanik malunnarunnaarsaasarnermi inuit inatsisinik unioqqutitsinerit pillarneqaataasinnaasut aqqutigalugit aningaasatigut iluanaarutit ilaannik pissarsiniartut, imaluunniit inatsisinik unioqqutitsinerit pillarneqaataasinnaasut aqqutigalugit aningaasatigut iluanaarutininik qulakkeerinninniartut nuussiniartullu ilaapput. Paasissutissat taakku akileraarutininik tunngasuni aamma soqutiginarsinnaapput, s. i. paasissutissanit paasinarsippat akileraartartoq isertitalik, Kalaallit Nunaanni piaaraluni akileraarutininik akiliinngitsooriarsimasoq. Pisuni taamaattuni paasissutissat akileraartussaataitaasunik nakkutilliinissamut toqqaanermi atorneqarsinnaapput. Nakkutilliineq taanna tunngavigalugu akileraarutininik tunngavimmik qaffaasoqarsinnaavoq. Akileraaruteqanngitsooriaraluarneq piaaraluni imaluunniit mianersuaalliorujussuarluni peqquserluutigineqarsimappat, tamanna akileraartartumut saniatigut akiliutinngorlugit pineqaatissiissutininik kinguneqarsinnaavoq.

Siunnersuummut aamma siunertarineqarpoq aningaasanik malunnarunnaarsaasarneq nalunaarutit pissarsiarineqarsimasut akileraaruseriffimmi tatigeqatigiilluni suliarineqarnissaata qulakkeerneqarnissaa.

2.4 Akileraarutininik akiliutaagallartut - eqqunneqarnerata kingunerisaanik iluarsisassat iluarsineqarput

§ 27-mi malittarisassat atuuttut malillugit ingerlatseqatigiiffinni peqatigiiffinnilu akileraarutit ukiumi akileraarusiiffimmi akiliisitsiniutigineqassapput. Akileraarutit ukiup aningaarsiorfiusup kingorna ukiumi akiliisitsiniutigineqassammata, akileraarutit 6 procentimik tapiissutitut akiliutinik ilaneqassapput, Nunatta Karsiata akileraartartunut taarsigassarsisinaanermik periarfissiineranut akuliutitut.

Siunnersuutip siunertarivaa akuersissutigineqarnerata kingunerisaanik inatsimmi malittarisassat iluarsineqarnissaat, pissutigalugu, Akileraaruserinermik ingerlatsineq pillugu Inatsisartut inatsisaata allanngortinneqarnissaanik siunnersuummi, ingerlatseqatigiiffiit akileraarutininik akiliutaagallartut akilernissaannut periarfissinneqarnissaat siunnersuutigineqarmat. Akileraarutininik akiliutaagallartut ukiup aningaarsiorfiusup ingerlanerani akilerneqartassapput tassungalu siunertarineqarpoq ukiumut aningaarsiorfiusumut ingerlatseqatigiiffinnut akileraarutit tamakkiisumik killilimmilluunniit akilerneqarnissaa.

Akileraarutininik akiliutaagallartut akilernerisigut ingerlatseqatigiiffiit akileraarutit 6 procentimik tapiissutitut akiliutinik ilaneqarnissaat ingalassinnaavaat, tamannalu oqilisaaneruvoq. Ingerlatseqatigiiffiit periarfissamik tassanga atuinerisa annertussusaat malillugu, ingerlatseqatigiiffinnut akileraarutit sukkanerusumik akilerneqarnissaat Nunatta Karsiata angussavaa, kisianni Nunatta Karsiata akerlianik akileraarutininik tapiissummit iluanaarut annaassavaa.

3. Pisortanut aningaasaqarnikkut allaffissorinikkullu kingunerisassat

Isertitat pillugit paasissutissanik nunani avannarlerni oqartussaasunut ingerlatitseqqissinnaaneq pillugu siunnersuummi aalajangersakkap akileraaruseriffimmut killilimmik aningaasartuutaanerunissaa naatsorsuutigineqarpoq. Tamatumani suliassap akileraaruseriffimmi nalinginnaasumik allaffissornermi sulianut ilanngunneqarnissaa naatsorsuutigineqarpoq, taamaattumillu aningaasartuutaanerusussat maanna aningaasaliissutit iluanni akilerneqarsinnaanissaat naatsorsuutigineqarluni.

Siunnersortit killeqarfiit akimorlugit aaqqissuussinernik nalunaaruteqartarnissaat pillugu malittarisassat aalajangersaanissamut piginnaatitsinermi aningaasartuutissat missingeruminaapput aammalu siunnersuutip pisortanut aningaasaqarnikkut kingunerisassai naatsorsoruminaassapput. Siunnersuut inunnut inatsisillu malillugit inuttut isigineqarsinnaasunut akileraarnissamik pinngitsoorsimasunut anusinngorsaataasinnaatillugu tamanna iluanaaruteqarnerunermik nassataqarsinnaassaaq. Siunnersuut immikkut aaqqissuussinernik kingusinnerusukkut inatsisiliorfigineqarsinnaasunik paasisaqarfigineqarsinnaappat, tamanna pisortat aningaasaqarnerannut pitsaasumik nassataqassaaq, tamannali inatsisiliorqoqassappat nalilerneqartariaqarpoq.

Suliassap allaffissorinikkut teknikikkullu ingerlanneqarnissaanut atatillugu akileraaruseriffik aningaasartuuteqassasoq nalilerneqarpoq. Teknikimut tunngasortaata ineriartortinneqarnissaanut il.il. aningaasartuutit assut nalornissutaasumik 0,5 mio. kr.-nik amerlassuseqarnissaat missingerneqarpoq, tamatumani ilaallutik tigusineq, paasissutissanik suliarinninneq avitseqatigiinnerlu.

Tamatuma saniatigut OECD-mut nalunaaruteqarnissami atugassatut ilaatigut periutsip ingerlanneqarnissaanut aserfallatsaalineqarnissaanullu, nakkutilliinissamut, ilitsersuinissamut, annaasaqaataasinnaasunik naliliinissamut, sulianut misiliissutinut aammalu periusissaq pillugu nassuiaatinik suliaqarnermut aningaasartuuteqartoqassaaq. Annertussusissaat naatsorsuutigineqartut aallaavigalugu naliliinermi tamatumunnga aningaasartuutit annertuumik nangaanartoqartillugit 200.000 kr.-nik imaluunniit ukioq naallugu sulisorisanut 1/4-tut annertussuseqarnissaat naatsorsuutigineqarpoq.

Allaffissornermut aningaasartuutit Akileraartarnermut Aqutsisoqarfiup aningaasaliissutaasa iluanni akilerneqassapput, tassami suliassat maleruagassani siunnersuutigineqartuni ilaatinneqartut aammalu nussuinermi akiliisitsisarnerup iluani aqutsisoqarfiup suliassaasa annertuumik assigiinnerat naatsorsuutigineqartariaqartoq eqqarsaatigineqarmat. Ingerlatseqatigiiffinnut akileraarutit akilerallakkat akilernissaannut periarfissat aningaasaqarnikkut aqutsinikkullu kingunerisaannik allaaserinninnermut aningaasarsianit akileraarutit pillugit inatsisartut inatsisaannik allannguutissatut siunnersuummut oqaaseqaatit aamma 2021-mi ukiaanerani ataatsimiinnermi saqqummiunneqartut innersuussutigineqarput.

Nunani allani oqartussanit paasissutissanik pissarsisarneq tunniussisarnerlu pillugit siunnersuummi aalajangersakkanni pingaarnertut tassaapput teknikimut aqutsinermullu tunngasut, taamaammallu aningaasatigut aqutsinikkullu kinguneqarnissaat naatsorsuutigineqarani. Piffissap ingerlanerani akileraaruseriffiup aningaasanik malunnarunnaarsaasarneq nalunaarutininik pissarsisinnaalernerani, akileraarutinit iluanaarutit annertunerulernissaat, kisianni taakkua annertussusissaat maannakkut aalajangiunneqarsinnaangilaq.

4. Inuussutissarsiutinik ingerlataqartunut aningaasaqarnikkut allaffissornikkullu kingunerisassat

Isertitat pillugit paasissutissanik naalagaaffimmi oqartussaasunut ingerlatitseqqittarneq pillugu siunnersuummi aalajangersagaq inuussutissarsiutinik ingerlataqartunut aningaasaqarnikkut kinguneqassangatinneqanngilaq.

Aammattaaq killeqarfiit akimorlugit aaqquissuussinernik siunnersortit nalunaaruteqartarnissaat malittarisassanik aalajangersaanissamut piginnaatitsineq inuussutissarsiutinik ingerlataqartunut aningaasaqarnikkut kinguneqassangatinneqanngilaq.

Inatsisissatut siunnersuut inuussutissarsiutinik ingerlataqartut allaffissornikkut suliaqarnerulernissaannik nassataqassaaq, tassa malittarisassat malillugit pingaartumik siunnersortit paasissutissat aalajangersimasut pillugit akileraaruseriffimmut nalunaaruteqartarnissaannik pisussaaffiliissammata. Suliaqarnerulernissaq annertussangatinneqanngilaq, tassa taakku pingaartumik akileraarutit pillugit siunnersortinut il.il. akileraarnermi malittarisassat malinneqarnissaannik qulakkeernissamik immikkut ilinniarsimasunut tussammata. Akunnermiliuttut eqqarsaatigalugit taakku paasissutissanik pigeriikkaminnik nalunaaruteqarnermikkut nalunaaruteqartussaataaneq naammassisinnaavaat.

Ingerlatseqatigiiffinnut akileraarutit akilerallakkat akilernissaannut periarfissat aningaasaqarnikkut aqutsinikkullu kingunerisaannik allaaserinninnermut aningaasarsianit akileraarutit pillugit inatsisartut inatsisaannik allannguutissatut siunnersuummut oqaaseqaatit innersuussutigineqarput.

5. Avatangiisinut, pinngortitamut innuttaasullu peqqissusaannut kingunerisassat

Inatsisissatut siunnersuut avatangiisinut, pinngortitamut innuttaasulluunniit peqqissusiannut kinguneqassangatinneqanngilaq.

6. Innuttaasunut kingunerisassat

Nunani avannarlerni oqartussaasunut isertitat pillugit paasissutissanik ingerlatitseqqittarnissaq pillugu siunnersuummi aalajangersagaq katissimallugu aapparissamut meeqqanullu akiliuteqartoqarnissaa pillugu pilertornerusumik aalajangiisoqarsinnaanerani

nassataqassasoq naatsorsuutigineqarpoq. Tamanna pingaartumik akiliutinik pisartagaqartunut iluaqutaassangatinneqarpoq.

Siunnersortit killeqarfiit akimorlugit aaqquissuussinerni nalunaaruteqartarnissaat pillugu malittarisassanik aalajangersaanissamut piginnaatitsissut innuttaasunut allaffissornikkut killilimmik nassataqassangatinneqarpoq. Naak akileraaruteqartartoq naggataatigut nalunaaruteqartussaataitaagaluartoq pisuni amerlanerpaani akunnermiliuttoq nalunaaruteqartussaataitaasoq ilaatinneqassasoq nalilerneqarpoq.

7. Kingunerisassat annertuut allat

Soqanngilaq.

8. Oqartussaasunik, kattuffinnik il.il. tusarniaaneq

Siunnersuut piffissami 2. juni 2021-mit 30. juni 2021-mut makkununga tusarniaassutigineqarpoq:

Naalakkersuisut Siulittaasuata Naalakkersuisoqarfia; Ineqarnermut, Attaveqaqatigiinnermut Naligiissitaanermullu Naalakkersuisoqarfik; Aatsitassanut Naalakkersuisoqarfik, Ilinniartitaanermut, Kulturimut, Timersornermut Ilageeqarnermullu Naalakkersuisoqarfik; Aalisarnermut Pinarnermullu Naalakkersuisoqarfik; Nunalerinnermut, Imminut Pilersornermut, Nukissiuuteqarnermut Avatangiisinullu Naalakkersuisoqarfik; Peqqissutsimut Naalakkersuisoqarfik; Isumaginninnermut Suliffeqarnermullu Naalakkersuisoqarfik; Meeqqanut, Inuusuttunut, Ilaqutariinnut Inatsisillu atuutsinneqarnerannut Naalakkersuisoqarfik; Inuussutissarsiornermut, Niuernermut, Nunanut allanut Silaannaallu pissusaata allanngoriartorneranut Naalakkersuisoqarfik; Avannaata Kommunua, Kommuneqarfik Sermersooq, Kommune Qeqertalik, Qeqqata Kommunua, Kommune Kujalleq, Grønlandske Advokater, Deloitte, Grønlands Revisionskontor, BK Revision, EY Grønland, BDO, SIK, Grønlands Erhverv (GE), NUSUKA, GrønlandsBanken aamma BankNordik

Tusarniaanermut akissutit suliarineqarnerat allakkap uuma naanerani ilanngussaq 2-tut inissinneqarput.

Siunnersuummi aalajangersakkanut ataasiakkaanut nassuiaatit*§ 1-imut*

Nr. 1-imut

Allannguut tassaavoq, Kalaallit Nunaannut Pinerluttulerinermut inatsimmi malittarisassanut innersuussissutip naqqinneqarnissaa.

Nr. 2-mut

Aningaasanik malunnarunnaarsaasarneq pillugu paasissutissat danskinit imaluunnit nunani allani aningaasanik malunnarunnaarsaasarnermik oqartussaasunit pissarsiarineqarsimasut, akileraaruseriffiup sulisuinit il.il. § 9 malillugu isertuussatut suliarineqassapput.

Tamatuma saniatigut aalajangersakkami nalunaarsorsimasoq aningaasanik malunnaarunnaarsaasarnermut nalunaarutiginninnernik akileraaruseriffiup tigusimasinnaasaanik takunnissinnaanermik piginnaatitaaneranik mattunneqarpoq. Qallunaat nunanilu allani aningaasanik malunnarunnaarsaanermik oqartussaasut akileraartarnermilu oqartussaasut nalunaarsorneqarsimasup paasissutissanik nalunaarsorneqarsimasunik paasisaqarnissaanik aarleqquteqarnatik aningaasanik malunnarunnaarsakkanik tamakkiisumik nalunaarsuisinnaanerata pisinnaanissaa siunertaavoq.

Tassani inuit akileraartussaataasut il.il. aningaasanik malunnaarunnaarsakkat pillugit paasissutissanik mattunneqarnerminni inatsisitigut illersugaanerannik annaasaqannginnissaat pingaartinneqarpoq, akileraartarnermummi aqutsisoqarfiup aalajangernermini toqqammavii imminnermini aningaasat malunnarunnaarsakkat pillugit nalunaarutininnaanneernatik, paasissutissanit akileraartarnermut ingerlatsiviup nakkutilliinerminut atatillugu pissarsiaaninnaanneersuusimassammata.

Aningaasanik malunnarunnaarsaanernik nalunaarutit akileraartarnermut ingerlatsiviup akilerartussaataasut sorliit nakkutilliinissamut toqqarneqarnissaanut naliliinermit taamaallaat atorineqassapput. Akileraartussaataasulli akileraartarnermut ingerlatsivimmit pisariaqartitsinermik naliliisoqarpat nakkutilliiffigineqarnissamut toqqarneqarsinnaapput.

Sulianut taamaattunut atatillugu akileraartarnermut ingerlatsiviup nakkutilliinermit pisinnaatitsissutit nalinginnaasut, inatsisikkut ugguuna, aningaasarsianullu akileraarusiisarneq pillugu Inatsisartut inatsisaanni il.il. akileraaruseriffimmut pisinnaatitsisut atussavai. Nakkutilliinerit assersuutigalugu aningaaserivimmi nalunaarsukkanik aningaaserivimmit pissarsinikkut pisinnaavoq, takuuk inatsimmi § 65, imaluunniit avammut nakkutillineq, tak. §§ 58-59.

Nr. 3-mut

§ 27, imm. 1-imi allannguutaasoq, aningaasarsianit akileraarutit pillugit inatsisartut inatsisaanni § 85 a-mi akileraarutinit akiliutaagallartut akiliisoqarsinnaanerata ammaanpeqarnerata kinguneranik aaqqissuineruvoq.

Ingerlatseqatigiiffinnut peqatigiiffinnullu il. il. akileraarutit ukiumut inaarutaasumik naatsorsorneqarsimasut, akileraarutinit akiliutaagallartut pillugit inatsisartut inatsisaanni § 85 a malillugu akileraarutinit akilerallakkanit anneruppata, assigiinngissut akileraarutit 6 procentimik tapiissutitut akiliutinik ilallugit akiliisitsiniutigineqassapput. Tamannali taamaallaat atuutissaaq akileraarutissat 99 kr.-nit annertuneruppata.

Aalajangersakkami imm. 2 malillugu aalajangerneqarpoq, akileraarutit ukiumi akileraarusiiffimmi ulloq 1. novembari akilerneqartussaasut, piffissaagallartillugu akiliiffissaq kingulleq tassaalluni ulloq 20. novembari. Aalajangersakkap imm. 2 atuuttoq assigaa.

Aalajangersakkami imm. 3, taanna nutaavoq, aalajangerneqarpoq, akileraarutinit akiliutaagallartut ukiumut akileraarutinit inaarutaasumik naatsorsorneqarsimasunit anneruppata, akileraarutit aningaasartaat akiliinermi annaarutaasimasut akileraaruseriffimmit utertineqassapput. Utertitsineq kingusinnerpaamik ukioq nalimmassaaffiusumi ulloq 20. november pissaaq.

Akileraarutissaviit qaangerlugit akileraarutinit akiliutaagallartunut taartisiaqartitsisoqanngilaq. Tassunga tunuliaqutaasoq tassaavoq, aningaasarsianit akileraarutit pillugit inatsisartut inatsisaanni § 85 a malillugu, akileraarutinit akiliutaagallartunik akiliinissamut akileraartartut pisussaannngimmata. Taartisiaq aamma saniatigut akileraartartunit atoriaannarnik aningaasaatini sinneqartoorutit ernialersornissaat anguniarlugu, Nunatta Karsianut ajoqutaasumik atornerlunneqarsinnaavoq.

Siunnersuutip § 27, imm. 4 atuuttumi imm. 3-p assigaa. Akileraaruseriffik imaluunniit Akileraarusiinemik Aalajangiisartut akileraarutit qaffanneqarnissaannik kinguneqartumik kingusinnerusukkut aalajangiineqarpat, akileraarutit 6 procentimik tapiissutitut akiliutinik ilallugit akiliisitsiniutigineqassapput qaammatip aalajangiinermi qaammatit pingasut qaangiunneranni tulliuttup aallaqqaataani akiligassanngussapput, qaammatillu akiligassanngorfiup ulluisa 20-at tassaalluni piffissaatillugu akiliiffissaq kingullerpaaq. Akileraarutit qaffanneqartut tapiissutitut akiliutinik ilallit, ukiumi akileraarusiiffimmi ulloq 1. novembarimit aallartittumik qaammatit aallartinneri tamaasa 0,5 procentimik aalajangiinemik nalunaarummi ulloq tikillugu erniaqartinneqassapput.

Aalajangersakkap imm. 5. atuuttumi imm. 4 assigaa. Aalajangersakkani innersuussissutit imm. 3 nutaap eqqunneqarnerata kingunerisaanik iluarsisassat iluarsineqarput.

Akileraaruseriffik, Akileraarusiinemik Aalajangiisartut imaluunniit eqqartuussisut akileraarutissat apparneqarnerannik kinguneqartumik kingusinnerusukkut aalajangiippata

akileraarutit aningaasartaat akiliinermi annaarutaasimasut aalajangiinerup kingorna qaammatip ataatsip qaangiutinnginnerani 6 procentimik tapiissutitut akiliutinik ilallugit utertinneqassapput. Akileraartussaataitaq aningaasat utertinneqartut pillugit ukiumi akileraarusiiffimmi 1. novembarimit aallartittumik qaammatit tamaasa 0,5 procentimik aalajangiinermik nalunaarummi ulloq tikillugu erniaqartinneqassaaq.

Aalajangersakkap imm. 7. atuuttumi imm. 6 assigaa, taamaattoq innersuussissutit nutaap eqqunneqarnerata kingunerisaanik iluarsisassat iluarsineqarput.

Akileraaruseriffik malittarisassat Naalakkersuisunit aalajangerneqarsimasut malillugit pissutsini immikkut ittuni, ingerlatseqatigiiffinnut peqatigiiffinnullu il. il. akileraarutinik akiliisitsiniarnermi Imm. 1-imi, 4-mi aamma 5-imi tapiissutitut akiliutinik ilasisoqannginnissaa, ilagalugit assersuutigalugu niueqatigiit nioqqutissioqatigiilluunniit killilimmik akisussaaffillit akuersisinnaavoq.

Nr. 4-mut

§ 29-mi § 27-mi aalajangersakkanut innersuussissutit, nutaamik § 27, imm. 3-mik ilanngussisoqarnerata kingunerisaanik iluarsisassat iluarsineqarput.

Nr. 5-imut.

§ 66 a-mik nutaamik ilanngussisoqarnissaa siunnersuutigineqarpoq, taanna malillugu akunnermiliuttut akileraartartullu susassaartut killeqarfiit akimorlugit aaqqissuussinernik ilisimasaminnik, atukkaminnik imaluunniit nakkutilliiffigisaminnik akileraaruseriffimmut paasissutissiinissaat pillugu malittarisassanik aalajangersaanissamut Naalakkersuisut piginnaatinneqarlutik.

Piginnaatitsissut ilaatigut OECD-p suliassaqarfimmi periutsinut malittarisassarititai (Model Mandatory Disclosure Rules for CRS Avoidance Arrangements and Opaque Offshore Structures) atuutsilerlugit ilusilerneqarpoq.

Akileraaruserinermik ingerlatsivik killeqarfiit akimorlugit aaqqissuussinermik, malittarisassat naapertorlugit nalunaarutigineqartumik, qisuariangippat, aaqqissuussinermik tassanga iliuuseqannginneq akuersinertut isigineqassanngitsoq, taamatullu aalajangersimasumik akileraartarnikkut sullinneqarnissamik pisinnaatitaaffiliinngitsoq pillugu imm. 2-mik ivertitsisoqassasoq tassunga ilanngullugu siunnersuutigineqarpoq.

Akunermiliuttut killeqarfiit akimorlugit aaqqissuussinerit nalunaaruteqartarnissaat pillugu malittarisassanik Naalakkersuisut aalajangersaanerisigut taaguutit ”akunermiliuttut” aammalu ”killeqarfiit akimorlugit aaqqissuussinerit” EU-p DAC6-imik aalajangersagaa aammalu OECD-p periutsinut malittarisassiai malillugit paasineqassapput.

Oqariaaseq "akunnermiliuttut" DAC6 malillugu ima paasineqassaaq inuk kinaluunniit aaqqissuussinernik ilusilersuisoq, nittarsaassisoq, aaqqissuussisoq aaqqissuussinerulluunniit ingerlanneqarnissaa siunertaralugu aaqqissuussinernik atuisinnaatitsisoq imaluunniit killeqarfiit akimorlugit aaqqissuussinernik nalunaarutaasussaataitaasumik atuutsitsilernissamik aqutsisoq.

Oqariaatsimi aamma ilaatinneqarput inuit kikkulluunniit killeqarfik akimorlugu aaqqissuussinernik nalunaarutigineqartussaataitaasumik ingerlatsinissaq aqutsinissarlunniit siunertaralugu toqqaannartumik inuilluunniit allat ikiortigalugit ikorfartuinissamut, ikiuunnissamut siunnersuinissamulluunniit pisussaaffilerneqarsimasut. Inuk taamatut pisussaaffilittut isigineqassaaq pineqartoq ilisimasassat pissutsillu attuumassuteqartut tamaasa eqqarsaatigalugit aammalu paasissutissat pigineqartut tunngavigalugit aammalu taama kiffartuussinissamut immikkut ilisimasariaqakkat paasisimasassallu attuumassuteqartut tunngavigalugit tamatumunnga pisussaaffilersimasutut ilisimasaqarnissamut ilisimasaqartutut naatsorsuutigineqarsinnaasoq.

OECD-p periusissanut malittarisassai eqqarsaatigalugit tamatumani ilaatinneqarput akunnermiliuttut CRS avaqqunniarlugu aaqqissuussinernik ilusilersuinermut nittarsaassinermulluunniit akisussaasut imaluunniit imartani aaqqissuussani paasiuminaatsunik pilersitsinermut akisussaasut aammalu inuit aaqqissuussinerit taamaattut ilusilersorneqarneranni, nittarsaanneqarneranni, atuutsinneqalernissaanni aaqqissuunneqarneranniluunniit ikiortaasut.

Oqariaaseq akileraartartoq susassaartoq tamanna pillugu DAC6-imi nassuiaat naapertorlugu paasineqassaaq. Tassani allassimavoq akileraartartoq susassaartoq kinaluunniit tassaasoq killeqarfik akimorlugu aaqqissuussinernik nalunaarutigineqartussaataitaasumik ingerlatsinissaq siunertaralugu killeqarfik akimorlugu aaqqissuussinernik nalunaarutigineqartussaataitaasumillu atugassiisoq imaluunniit taama aaqqissuussinissamut aallarniisoq. OECD-p periusissanut malittarisassai eqqarsaatigalugit oqariaaseq tamanna oqariaatsimut "reportable taxpayer" atatillugu paasineqassaaq, taanna malillugu CSR-imik malinninnginnissamut aaqqissuussinermut atatillugu kinaluunniit aaqqissuussinernik atuisoq atueriaannaasorluunniit aammalu imartani aaqqissuussinernik takujuminaatsumik pilersitsinissamut aaqqissuussinermut atatillugu inuk imartani aaqqissuussineq takujuminaatsoq pissutigalugu piginnittut kinaassusia aalajangeruminaatsoq.

DAC6 malillugu akileraartartoq susassaartoq naalagaaffimmi akileraartarnikkut angerlarsimaffigisamini nalunaaruteqartussaataitaavoq, tassani akileraartartoq susassaartoq aaqqissuussineq atorluarlugu aalajangersimasumik ingerlatsiveqarluni, tassani akileraartartoq susassaartoq akileraartarnikkut angerlarsimaffiginngikkaluarlugu aalajangersimasumillu ingerlatsiviginngikkaluarlugu isertitaqartarluni sinneqartooruteqartarluniluunniit imaluunniit naalagaaffimmi akileraartartoq susassaartoq akileraartarnikkut angerlarsimaffiginngikkaluarlugu ingerlataqarfeqarluni, naak akileraartartoq susassaartoq

naalagaaffinni suniluunniit akileraartarnikkut angerlarsimaffeqanngikkaluarluni aalajangersimasumilluunniit ingerlatsiveqanngikkaluarluni. Naalagaaffimmut naalagaaffimmit allamit salliusumut nalunaaruteqartussaataaneq naalagaaffiup aappaanut nalunaarsorsimaffimmi allassimasumut tassunga nalunaaruteqartussaataanermit salliutinneqartussaavoq.

OECD-p periusissanut malittarisassai malillugit akileraartartut susasaqartut oqartussaaffeqarfimmi tassani najugaqartut kisimik tassunga nalunaaruteqartussaataapput.

”Aaqqissuussineq” sunaanersoq erseqqinnerusumik nassuiarneqanngilaq, nalunaarneqarsimallunili aaqqissuussinermi aaqqissuussinerit arlallit ilaatinneqassasut aammalu aaqqissuussinermi alloriarnerit immikkoortulluunniit arlallit ilaatinneqarsinnaasut.

Oqariartaaserli allanut atatillugu nassuiaatigineqarpoq. Tamanna apeqqutaatinnagu taakku oqariartaatsip paasineqarnissaanut isumassarsisinnaapput, taanna ilaatigut tassaasinnaavoq Den Europæiske Unionimi Kommissionip akileraarutikinnerusunut nuuttarneq pillugu unnersuussutaa ulloq 6. december 2012-imeersoq (2012/772/EU), tassani nassuiaatigineqarluni aaqqissuussineq nuussinernut sunulluunniit, pilersaarutinut, iliuserisanut, iliutsinut, isumaqatigiissutinut, tunniussinernut, paasinninnernut, neriorsuutinut, ilimasaarutinut pisussamulluunniit attuumassuteqartut. Tamatuma saniatigut ilassutigineqarpoq ingerlataq (aaqqissuussineq) arlalinnik alloriarneqarsinnaalluniluunniit immikkoortoqarsinnaasoq.

Aamma oqariaatsip ”aaqqissuussinerit” qanoq paasineqarnissaanut isumassarsiorfissat OECD-p periusissanut malittarisassaani nassaarineqarsinnaapput, taanna oqariaatsip nassuiaataanik imaqarluni. Tassani allassimavoq oqariaatsimut ilaatinneqartut isumaqatigiissut, nalunaarsuiffik, pilersaarut paasinnittaaserluunniit inatsisitigut pituttorsimappat pituttorsimangippalluunniit aammalu tassani ilaallutik tamassuma ingerlatinnissaanut allariarnerit nuussinerillu tamarmik.

Oqariaatsip ”aaqqissuussineq”-p paasineqarnissaanut ilanngussat taakku marluk paasinarsisippaat oqariaaseq assigiinngitsorpassuarnik nalinginnaasumik paasineqartartoq. Taamaattorli aaqqissuussineq pineqarsinnaassappat erseqqissaateqartoqarnissaanut piumasqaammik ilanngussisoqarsinnaasariaqarpoq. Assersuutigalugu akileraartarnermi aaqqissuussinerit nalinginnaasumik nassuiaataat atuakkami imaluunniit ingerlatseqatigiiffiup akileraartarnermut politikiani pingaarnertut najoqqutassani taamaalillutik ilaatinneqassanngillat.

Oqariaaseq ”aaqqissuussineq” ima akuttutigissaaq oqariaaseq immini killeqarfiit akimorlugit aaqqissuussinerit nalunaarutigineqartussaataasut nassuiarneqarneranni pingaarnertut tunngavigineqarnani. Killiliinissami pingaarnerpaaq tasaaneruvoq aaqqissuussinerup killeqarfimmik akimuisumik tunngavissamik imaqarnissaa aammalu tapiinissamut

najoqqutarisassanut ilanngussaq IV-mi ilisarnaatini annikinnerpaamik ataatsip DAC-mi oqaasertalerneqartup eqquutsinneqarsimanissaa.

DAC6 malillugu ”killeqarfik akimorlugu aaqqissuussineq” ima paasineqassaaq aaqqissuussineq oqartussaaffinni arlalinni atuuttoq, tamatumani piumasaqaatinit matumani allassimasunit minnerpaamik ataaseq eqquutsinneqarsimassalluni:

Aaqqissuussinermi peqataasut akileraartarnikkut oqartussaaffimmi ataatsimi angerlarsimaffillit tamarmiunngillat, tamatuma peqatigisaanik aaqqissuussinermi ilaasoq ataaseq arlallilluunniit ingerlatsiffik oqartussaaffimmi allami inissisimasoq aalajangersimasoq aqputigalugu oqartussaaffimmi allami angerlarsimaffeqarput aammalu aaqqissuussineq sumiiffiup ingerlatsiffiup aalajangersimasumik ingerlataqarfiata pineqartup ilaani tamarmiluunniit ilaavoq, aaqqissuussinermi peqataasoq ataaseq arlallilluunniit oqartussaaffimmi akileraartarnikkut angerlarsimaffeqarnatik ingerlataqarput imaluunniit oqartussaaffimmi pineqartumi inissisimasumik aalajangersimasumik ingerlatsiffimmik pilersitsipput imaluunniit aaqqissuussineq paasissutissanik ingerlaannartumik avitseqatigiinnermut imaluunniit piginnittut kinaassusersiniarnissaannut sunniuteqarsinnaavoq.

OECD-p periusissanut malittarisassai eqqarsaatigalugit killeqarfiit akimorlugit aaqqissuussinermi ima paasineqassapput CSR-ip avaqunneqarnissaanut imaluunniit imartani aaqqissuussinernik ersarinngitsunik periusissanut malittarisassani ilaatinneqartunik pilersitsinissamut aaqqissuussinertut.

Aalajangersagassatut siunnersuutigineqartumi ilaatinneqarpoq akunnermiliuttut paasissutissanik ilisimasaminnik, paarisaminnik nakkutigisaminnilluunniit nalunaaruteqartarnissaat pillugu Naalackersuisut malittarisassanik taamaallaat aalajangersaasinnaassasut.

Tamanna isumaqarpoq akunnermiliuttut paasissutissanik ilisimanngisaminnik, paarinngisaminnik nakkutiginnngisaminnilluunniit pissarsiniartarnissaat pillugu malittarisassanik Naalackersuisut aalajangersaasinnaassanngitsut. Aamma allat, assersuutigalugu akileraartartup susassaartup akunnermiliuttulluunniit allat paasissutissat taakku nalunaarutigineqarnissaat siunertaralugu akunnermiliuttumut nalunaartussaataasumut paasissutissiinissamut pisussaaffeqarnissaat pillugu malittarisassanik Naalackersuisut aalajangersaasinnaanngillat.

Akileraaruserinermik ingerlatsineq pillugu inatsimmi § 66 a-mi oqaaseqatigiit aappaanni siunnersuutigineqarpoq, akunnermiliuttut killeqarfiit akimorlugit aaqqissuussinernik nalunaaruteqartarnissaat pillugu malittarisassanik aalajangersaanermi atatillugu Naalackersuisut nalunaaruteqartussaataaerminermik pisussaataajunnaarneq nalunaaruteqarpat akunnermiliuttunut allanut akileraartartunulluunniit susassaartunut nalunaarnissaq pillugu

malittarisassanik aalajangersaasinnaassasut. Tamanna periarfissiivoq akunnermiliuttoq nipangiussimasussaataitaasoq akunnermiliuttunut allanut akileraartartunulluunniit susassaartunut nalunaaruteqartussaataitaanerit pillugu taakkununga nalunaaruteqartarnissaat pillugu malittarisassanik Naalackersuisut aalajangersaasinnaassammata.

Naalackersuisut DAC6-imi malittarisassap assigisaanik malittarisassaliorsinnaassapput, taakku malillugit eqqartuussissuserisup sullitallu akornanni attaveqatigiinnerup isertuunneqarnissaata imaluunniit naalagaaffiup ilaasortaasup nuna tamakkerlugu inatsisaa naapertorlugu nipangiussisussaataitaanerup assingusup inatsisinik tunngavillip nalunaaruteqartussaataitaanermit innarlerneqarnerata nassatarisaanik akunnermiliuttoq nalunaaruteqarnissamik pisussaatinneqanngippat akunnermiliuttup akunnermiliuttut allat akileraartartorluunniit susassaartoq nalunaaruteqartussaataitaanerit pillugu ingerlaannartumik ilisimatissavai.

OECD-p periusissanut malittarisassai taamatut pisoqartillugu akileraartartut susassaartut nalunaarsorneqarnissaannut pisussaaffimmik assingusumik imaqarput. Siunnersuut malillugu immikkoortumi taamaattumi periusissanut malittarisassanik atuutsitsiffiulersunik malittarisassanik Naalackersuisut aalajangersaasinnaassapput. OECD-p periusissanut malittarisassai nalunaaruteqartussaataitaanerup akunnermiliuttumit akunnermiliuttumut allamut ingerlatinneqarsinnaanera pillugu malittarisassanik imaqanngillat.

Akileraaruserinermik ingerlatsineq pillugu inatsimmi § 66 a-mi inatsisitigut tunngavissatut siunnersuut siullertut killeqarfiit akimorlugit aaqqissuussinerit nalunaaruteqarnissamut nalunaarsuinissamullu ingerlatsisunik malittarisassanik aalajangersaanissamut atorneqarsinnaassaaq.

Akunermiliuttut killeqarfiit akimorlugit aaqqissuussinerit nalunaaruteqartussaataitaaneri pillugit malittarisassanik siunnersuutip Naalackersuisut aalajangersaanissamut periarfissinneqarnissaannik tunngavissiissaaq. Tassunga atatillugu akunnermiliuttut nalunaaruteqartussaataitaasut killilersimaarnerat pillugu malittarisassanik Naalackersuisut aalajangersaasinnaassapput.

Tamatuma saniatigut aaqqissuussineq pineqartoq pillugu nalunaaruteqartussaataitaasumik akunnermiliuttoqanngippat imaluunniit akunnermiliuttoq nalunaaruteqartussaataitaarusunnani nalunaarutigippagu akileraartartut susassaartut killeqarfiit akimorlugit aaqqissuussinernik akileraartarnermik aqutsisoqarfimmut nalunaaruteqartussaataitaanerannik pisussaaffiliisunik malittarisassanik Naalackersuisut aalajangersaasinnaanerit siunnersuutip nassataraa.

Akileraartartut susassaartut killeqarfiit akimorlugit aaqqissuussinerit killissanik qaangiisut pillugit nalunaaruteqartussaataitaanerit pillugu malittarisassanik Naalackersuisut aalajangersaanerminnut atatillugu akileraartartut nalunaaruteqartussaataitaasut killilersorneqarnissaat pillugu malittarisassanik aalajangersaasinnaalissapput.

Siunnersuutip nassatarisaanik akunnermiliuttut akileraartartullu susassaqtut nalunaaruteqartussaataitaasut killilersimaarnissaat pillugu DAC6-imi malittarisassat aamma OECD-p periusissanut malittarisassai Kalaallit Nunaanni inatsimmi ingerlanneqarsinnaanissaannut malittarisassanik isumannaarisunik Naalakkersuisut nalunaarutikkut aalajangersaasinnaassapput.

Akileraaruserinermik ingerlatsineq pillugu inatsimmi tunngavissatut siunnersuutigineqartoq § 66 a, aappaatigut killeqarfinnik akimuisunik aqqissuussinernik nalunaaruteqartussaataitaasunik killiliisunik malittarisassanik aalajangersaanermut atorneqartussatut naatsorsuutigineqarpoq.

Killeqarfiit akimorlugit aqqissuussinerit akunnermiliuttut nalunaaruteqartarnissaat pillugu malittarisassanik Naalakkersuisut aalajangersaarnerannut atatillugu, killeqarfiit qaangerlugit aqqissuussinerit nalunaarutigineqartussaataitaasut killilersimaarnissaat pillugu malittarisassanik aalajangersaasinnaapput.

Killeqarfiit akimorlugit aqqissuussinerit nalunaarutigineqartussaataitaasut killilersimaarnerat pillugu tunngavissatut siunnersuutigineqartoq, DAC6-imi malittarisassat aamma OECD-p periusissanut malittarisassaasa Kalaallit Nunaanni inatsimmi ingerlanneqarsinnaanissaannik malittarisassanik isumannaarisunik Naalakkersuisut aalajangersaasinnaanissaannik.

Pingajuattut akileraaruserinermik ingerlatsineq pillugu inatsimmi tunngavissatut siunnersuutigineqartoq § 66 a, nalunaarutigineqartut imarisai pillugit malittarisassiornermut atorneqartussatut naatsorsuutigineqarpoq.

Nalunaarutit imarisassaat taakkulu nutarterneqartarnissaat pillugu malittarisassanik Naalakkersuisut aalajangersaasinnaanissaat siunnersuutip nassataraa. Aalajangersakkatut siunnersuutigineqartup Naalakkersuisut periarfississavai nalunaarutit imarisassaatut malittarisassat DAC6-imi aammalu OECD-p periusissanut malittarisassaanni nassaassaasut assinginik aalajangersaanissamut. Malittarisassat taakku aalajangersarnerannut atatillugu paasissutissat tuluit oqaasii atorlugit aamma avitseqatigiissutigineqartussat tuluit oqaasii atorlugit nalunaarutigineqartarnissaat pillugu malittarisassanik Naalakkersuisut aamma aalajangersaasinnaassapput.

Akunermiliuttut killeqarfiit akimorlugit aqqissuussinernik paasissutissanik ilisimasaminnik, tigummisaminnik nakkutilliiffigisanilluunniit nalunaaruteqartarnissaat pillugu Naalakkersuisut malittarisassanik aalajangersaanissaannut periarfissiivoq.

Akunermiliuttut paasissutissanik ilisimasaqarfiginngisaminnik, tigumminngisaminnik nakkutilliiffiginngisanilluunniit pissarsiniartarnissaannik nassataqartunik malittarisassanik Naalakkersuisut aalajangersaasinnaassanngillat. Aamma allat, assersuutigalugu akileraartartoq

sussaqartoq imaluunniit akunnermiliuttut allat akunnermiliuttumut nalunaaruteqartussaataasumut paasissutissanik, paasissutissat taakku nalunaarutigineqarnissaat siunertaralugu tunniussinissamut pisussaaffeqarnerat pillugu malittarisassanik Naalakkersuisut aalajangersaasinnaassanngillat.

Akunermiliuttut killeqarfiit akimorlugit aaqqissuussinerit nalunaaruteqartarnissaat pillugu malittarisassanik aalajangersaanerminnut atatillugu Naalakkersuisut nalunaaruteqarnissamut piffissarititit pillugit malittarisassanik aalajangersaasinnaapput. Tamanna DAC6-imi OECD-llu periusissanut malittarisassaani killissarititit pillugit malittariassat assinginik aalajangersaanissamut periarfissiisaaq.

Sisamaattut akileraaruserinermik ingerlatsineq pillugu inatsimmi tunngavissatut siunnersuutigineqartoq § 66 a, nalunaarutiginninnissamut ilisimatitsinissamulluunniit pisussaaffimmut ilaatinneqannginnisaaq pillugu malittarisassiorsinnaanerannut atorneqartussatut naatsorsuutigineqarpoq.

Akunermiliuttut killeqarfiit akimorlugit aaqqissuussinerit paasissutissanik nalunaaruteqartarnissaat pillugu malittarisassanik Naalakkersuisut aalajangersaanerminnut atatillugu nalunaaruteqartussaataannginnisaaq pillugu malittarisassanik aalajangersaasinnaanissaat siunnersuutip nassataraa.

Eqqartuussissuserisup sullitallu akornanni attaveqatigiinnerup isertuunneqarnissaata imaluunniit nipangiussisussaataanerup assingusup inatsisinik tunngavillip nalunaaruteqartussaataanermit innarlerneqarnerata nassatarisaanik akunnermiliuttut nalunaaruteqarnissamik pisussaatinneqannginnisaaq pillugu killeqarfik akimorlugu aaqqissuussineq DAC6-imi periarfissamik atorluaasunik malittarisassanik aalajangersaanissamut tamanna Naalakkersuisunut periarfissiisaaq. Eqqartuussissuserisut nipangiussisussaataanerisa nassatarisaanik taamaaqataanik nalunaaruteqannginnissamik OECD-p periusissanut malittarisassai imaqarput.

Inatsisissatut siunnersuut malillugu nalunaaruteqartussaataannginneq pillugu malittarisassanik aalajangersaanermi naatsorsuutigineqarpoq nipangiussisussaataaneq eqqartuussissuserisunut atuuttoq pillugu immikkut malittarisassat eqqumaffiginiarneqassapput. Taamaakkaluartoq killeqarfik akimorlugu aaqqissuussinermik nalunaaruteqartussaataaneq pillugu paasissutissani eqqartuussissuserisup akileraartartulluunniit susasaqartup akornanni isortuussisussaataanermit qitiusoq attorneqassanngilaq, taamaattumillu eqqartuussissuserisut nalunaaruteqartussaataanermit ilaatinneqavinnnginnisannut immikkut tunngavissaqanngitsoq nalilerneqarpoq.

Pisuni eqqartuussissuserisoq niuerfinni atorneqarsinnaasunik aaqqissuussinernik ilusilersuitillugu aammalu eqqartuussissuserisup/sullitap akornanni attaveqartoqanngitsillugu,

naatsorsuutaavoq tamatumani inatsisiliortoqassasoq kingornalu eqqartuussissuserisoq akunnermiliuttut allat assigalugit nalunaaruteqartussaallissalluni.

Pisuni eqqartuussissuserisoq killeqarfik akimorlugu aaqqissuussinermik nalunaarutigineqartussaataasumik akileraartartumut neqerooruteqartillugu eqqartuussissuserisoq nalunaaruteqarnissamut ullunik 30-nik piffissaqarluni akileraartarnermut ingerlatsivimmut nalunaaruteqartussaassaaq.

Akileraartartoq nammineq nalunaaruteqanngippat eqqartuussissuserisup ullunik 30-nik piffissaqartinneqarluni nalunaaruteqartussaanaera pillugu eqqartuussissuserisup akileraartartumut nalunaaruteqarnissaa malittarisassatut aalajangersarneqartussatut ilimagineqartut malitsigisaannik pissaaq. Nalunaaruteqarneq pisinnaavoq eqqartuussissuserisup paasissutissanik nalunaarutigineqartussaataasunik allaganngorlugit oqaasertaliormeratigut akileraartartumullu tunniussineratigut, taamaalilluni akileraartartoq nalunaaruteqarnerminut atatillugu paasissutissanik toqqaannartumik atuisinnaaqullugu. Ullut taakku 30-t iluanni paasissutissat Akileraartarnermut ingerlatsivimmut nassiunneqarnerat pillugu eqqartuussissuserisumut uppernarsaappat, piffissaritinneqartoq naatinnagu eqqartuussissuserisoq nammineq nalunaaruteqartussaassaaq.

Paasissutissat akileraartarnermut ingerlatsivimmut nassiunneqarnerannut uppernarsaatit piffissaritinneqartup naanerani akileraartartumit nassiunneqarsimangippata aammalu assersuutigalugu akileraartartup nalunaaruteqarnissaa eqqartuussissuserisumit naatsorsuutigineqarmat eqqartuussissuserisoq suli nalunaaruteqarsimangippat eqqartuussissuserisoq ingerlaannartumik nalunaaruteqartussaassaaq.

Paasissutissat sorliit nalunaaruteqartussaataaneremut ilaatinneqassanersut, tamannalu pissutigalugu akileraartartumut tunniunneqassanerat malittarisassat aalajangersarneqartussat ilimagineqartut malitsigisaannik nalilissallugu eqqartuussissuserisup pisussaaffigissavaa. Paasissutissat eqqartuussissuserisumit tunniunneqartut tamarmik nalunaarutigineqarsimanerat akileraartartumit eqqartuussissuserisumut uppernarsarneqanngippat paasissutissat sinneruttut eqqartuussissuserisup nammineq nalunaarutigisussaavai. Paasissutissat sinneruttut nalunaarutigineqartussaanaerat pillugu sullitap eqqartuussissuserisoq isumaqatiginngikkaluarpaguluunniit tamanna atuutissaaq.

Naggataatigullu malittarisassat aalajangersarneqartussat pissutsit immikkut illuinnartut atuuppata eqqartuussissuserisoq paasissutissanik nalunaaruteqarnissamut pisussaatinneqassanngitsoq nassatarissavaat. Aatsaat immikkut illuinnartumik pisoqartillugu pisussaatisoqassanngilaq, tamatumani sullitap soqutigisatut pisinnaatitaaffiisa isumagineqarnerat eqqarsaatigalugu tunngavissaqarluarpat. Tamanna pissaaq eqqartuussissuserisup nalunaaruteqarneratigut sullitaq nalunaarutigineqarnermigut inatsisinik unioqquutisisimasutut pasillerneqarsinnaappat imaluunniit taama isigineqalernissaminut annertuumik aarlerinartorsiorpat. Taama pisoqartillugu eqqartuussissuserisoq

akunnermiliuttuusinnaasunut allanut nalunaarsuissaaq. Nalunaarsugassaq tassaassaaq akunnermiliuttoq alla paasissutissanik paarisaminik nalunaaruteqassamat.

Tallimassaattut akileraaruserinermik ingerlatsineq pillugu inatsimmi tunngavissatut siunnersuutigineqartoq § 66 a, nalunaaruteqannginnerup ilisimatitsinngitsoornerulluunniit pineqaatissiissutaasinnaanissaat pillugu malittarisassanik aalajangersaasoqassaaq.

Akileraaruserinermik ingerlatsineq pillugu inatsimmi § 83 akileraaruserinermik ingerlatsineq pillugu inatsit naapertorlugu maleruagassiani atulersinneqarsimasuni pineqaatissiissutissat pillugit malittarisassanik aalajangersaanissamat tunngavissamik imaqarpoq. Taamaalilluni nalunaaruteqarnermut atatillugu piaaraluni imaluunniit sakkortuumik mianersuaalliorluni eqqunngitsunik paatsuunganartunilluunniit paasissutissiisooq nalunaaruteqarnerminut atatillugu nalunaaruteqartussaataitanermut immersugassamik immersuinngitsoq imaluunniit nalunaaruteqartussaataitanerit pillugit nalunaarummi malittarisassat naapertorlugit piffissaq eqqorlugu nalunaaruteqanngitsoq akiliisitaanermik pineqaatissinneqarsinnaasoq pillugu malittarisassanik aalajangersaasoqassasoq naatsorsuutigineqarpoq. Aammattaq pisuni akunnermiliuttoq nipangiussisussaataitanerup nassatarisaanik nalunaaruteqannginnissamik innersuussitillugu akunnermiliuttup akunnermiliuttunut allanut piaaraluni imaluunniit sakkortuumik mianersuaalliorluni nalunaaruteqanngitsoq akiliisitaanermik pillarneqarsinnaassasoq pillugu malittarisassanik aalajangersaasoqassasoq naatsorsuutaavoq.

Akunnermiliuttoq eqqartuussissuserisuuppat akunnermiliuttoq akileraartarnikkut oqartussaasunut nalunaaruteqartussaassaaq, akileraartartoq nalunaaruteqarsimanini pillugu nalunaaruteqarnissamat ullunik 30-nik piffissarititaasup naannginnerani eqqartuussissuserisumut nalunaaruteqarsimanngippat. Pisumi taamaattumi akileraartartoq nalunaaruteqarnissamat piffissaritinneqartup naannginnerani nalunaaruteqanngippat akileraartartoq tamatumunnga pineqaatissinneqarsinnaassanngilaq, tassa tamatuma kingorna nalunaaruteqartussaataitaneq eqqartuussissuserisumiilissamat aammalu paasissutissat nalunaarutigineqartussaataitasut pillugit akileraartarnermut ingerlatsiviup eqqartuussissuserisumit ilisimatinneqarnissaa akileraartartumit naatsorsuutigineqarsinnaatitaallissamat.

§ 66 a, imm. 2 naapertorlugu malittarisassat atuutsinneqartut malillugit killeqarfik akimorlugu aaqqissuussineq nalunaarutigineqartoq akileraartarnermut ingerlatsivimmit qisuariarfigineqanngippat tamanna aaqqissuussinerup tamatuma atuuttussaananeramik akileraartarnikkulluunniit tunngasutigut suliarineqarneranik akuersinerussanngitsoq akileraaruserinermik ingerlatsineq pillugu inatsimmi § 69 a-mi siunnersuutigineqarpoq.

Akileraartarnikkut oqartussaasut iliuuseqanngikkunik aaqqissuussinerit imaluunniit aaqqissuussinerit akileraartarnikkut suliarineqarnerata paasissutissanik pissarsiffigisamik atuuttussaananerannik akuersisimasutut isigineqassasut Kalaallit Nunaanni akileraartarnikkut malittarisassani ersarissunik malittarisassaqqanngilaq.

Taamaakkaluartuq ingerlatsinermik oqartussaasunit naatsorsuutaavoq oqartussaasut pissutsit malillugit iliuseqannginnerat akuersineqartut inatsisinit ikorfartorneqarsinnaasutut isigineqarsinnaasoq. Taamaattoqassappat oqartussaasoq susassaqtup pisoq pineqartoq pillugu pitsaasunik ilisimasaqarnissaa aamma ilisimasulersitsilluni iliuseqarnissaa, taamaalilluni pisoq pineqartoq oqartussaasunit ilumut isummerfigineqarsimassasoq pillugu innuttaasoq isumaqarnissamut tunngavissaqarsimaqqullugu pisariaqarpoq Taamaalilluni tamanna oqartussaasunit akuerineqarsimassasoq naatsorsuutigissallugu pissusissamisoorinnaassaaq, taamaalillunilu oqartussat pisoq pineqartup iliuseqarfiginissaanut pinngitsoortinneqarsinnaapput.

Innuttaasoq naatsorsuutiginninnissamut pisinnaatitaanersoq aamma naatsorsuutigisaq illersorneqassanersoq pillugit aalajangiinnissamut pisimasut assigiinngitsut arlallit taputartuunneqassapput. Innuttaasoq nalunaarutininik qanoq ittunik tigusaqarsimanersoq, inatsisitigut inissisimanerup allanit qularineqarnera innuttaasup paasisimasariaqarnera aamma piffissaq innuttaasup naatsorsuutiginninnermini malitaa ilaatigut pingaartinneqarsinnaassaaq. Pisut sorliit ilanngunneqassanersut aamma qanoq pingaartinneqartigissanersut suliamit suliamut allanngorarsinnaapput.

Taamaalilluni allassimavoq killeqarfik akimorlugu aaqqissuussineq imaluunniit paasisutissat pillugit nalunaarutigineqartut, akileraartarnermik ingerlatsivimmit nunani allani oqartussanit tigusai, akileraartarnermut ingerlatsivimmit qisuariarfigineqanngippata tamatuma kingunerissanngilaa aaqqissuussineq taassumaluunniit akileraartarnikkut kingunerisassai akileraartarnermut ingerlatsivimmit akuerineqarsimassasut.

Aalajangersagaq siunnersuutigineqartoq akileraartarneq pillugu inatsimmi pisoqalinissamut qisuariarnissamullu piffissaritinneqartunut attuumassuteqanngilaq, assersuutigalugu akileraaruserinermik ingerlatsineq pillugu inatsimmi § 47 aamma 48-mi suliamik aallartitseqqinnissamut piffissaritinneqartut aamma akileraaruserinermik ingerlatsineq pillugu inatsimmi § 47, imm. 2-mi qisuariarnissamut piffissaritinneqartoq. Tamatumunnga suliap aallarteqqinnissaanut piffissaritinneqartumik imaluunniit qisuariarnissamut piffissaritinneqartumik qaangiineq ima paasineqassanngimmata pisoq pisoqalisup atunneqarnermik imaluunniit tamatuma akileraartarnermut tunngasortaanik suliarinninnermik akuersineq pissutaavoq.

Nr. 6-imut

Siunnersuummi § 69 a nutaajuvoq.

Illuatungeriit aningaasaqarnikkut atugaat pillugit paasissutissanik nunani avannarlerni oqartussaasut akileraaruseriffimmut pissarsiniarnissamut periarfissinneqarnissaat siunnersuutigineqarpoq.

Akileraartarnermut ingerlatsivik paasissutissanut nalunaarsukkanut akisussaasuvoq, paasissutissanik piniartuq oqartussaasoq eqqortoq aammalu paasissutissat siunertamut allanneqartumut atorneqartussaasut misissuisussaalluni. Aalajangersagaq malillugu illuatungerisaq pillugu aningaasaqarnikkut paasissutissanik, tassungalu ilanngullugu inuup akileraarutaasussatut isertitai aammalu inaarutaasumik naatsorsuutit pillugit paasissutissanik akileraaruseriffik ingerlatitseqqissinnaavoq. Pissutsit apeqqutaatillugit paasissutissanut illuatungeriit aningaasaqarnerannut pissutsit pillugit paasissutissat pissarsiarineqarsinnaasut allat, suliap suliarineqarneranut pingaaruteqarsinnaasut ilaatinneqarsinnaapput.

Immikkoortoq nutaamik qulequtserneqassasoq siunnersuutigineqarpoq §§ 69 a aamma 69 b akornanni

§ 69 b-mik nutaamik, nunani allani oqartussat akileraaruseriffiullu akornanni paasissutissanik pissarsisarnermut tunniussisarnermullu tunngavissiisumik ilanngussisoqarnissaa siunnersuutigineqarpoq.

Nr. 1 malillugu aningaasanik malunnarunnaarsaasarnermi malittarisassanut ilanngullugu, imaluunniit akileraaruseriffiup nunani allani oqartussanik piginnaasunik aningaasanik malunnarunnaarsaasarneq aamma peqqarniisaarnianik aningaasalersuinerit pinaveersaartitsiniarnermi suleqateqarnerani iliuitsinut ilanngullugu ingerlatitseqqittoqarsinnaavoq.

Nr. 2-mi aalajangersakkat malillugit akileraarutitigut suliassatigut aqutsinikkut ikioqatigiinnissaq pillugu aqutsinikkut isumaqatigiisummik tunngaveqarpat ingerlatitseqqittoqarsinnaavoq.

Nr. 3 malillugu, nunani allani isumaqatigiinnikkut atortuusussatut aalajangiussaq imaluunniit isumaqatigiissut Kalaallit Nunaannut atuuttoq naapertorlugu pisariaqarpat ingerlatitseqqittoqarsinnaavoq.

§ 2-mut

Inatsit ulloq 1. januar 2022-mi atuutilissaaq.

Immikkoortoq 2-mut, § 66 a-tut siunnersuutigineqartoq malitsigisaanik atulersinneqartup, OECD-llu killeqarfinnik akimuisunik aaqqissuussinermi periutsitut malittarisassaasa atulersinneqarnissaanik siunertaqartoq, aaqqissuussinernut killeqarfinnik akimuisunut kinguneqassaaq, tassanilu alloriarneq siulleq ulloq 29. oktober 2014 kingusinnerusukkulluunniit piviusunngortinneqarpoq. Ulloq 29. oktober 2014 tassaavoq ulloq oqartussaaffeqarfiit 90-it sinnerlugit amerlassusillit periutsimik malinninnertik uppersarmassuk aammalu paasissutissanik ingerlaannartumik avitseqatigiittarnissaq pillugu nunani arlalinni oqartussat isumaqatigiissutaat oqartussaaffeqarfiit 51-it atsiorsimamassuk (CRS MCAA).

Taamaattumik killeqarfiit akimorlugit aaqqissuussinert ulloq 29. oktober 2014-ip kingorna pilersinneqartut aammalu CRS-imi malittarisassanik avaqqutsinermik nassataqartut CRS-imi malittarisassanik avaqqutsinissaq siunertaralugu pilersinneqarsimasutut ingerlanneqarsimasutullu nalilernerqarput. ulloq 29. oktober 2014 sioqqullugu aaqqissuussinerni alloriarnerit siulliit ilaatinneqanngillat.

Killeqarfiit akimorlugit aaqqissuussinert DAC6-imi nassuiaatit ilitsersuutillu malillugit pilersinneqartut alloriaarneq siulleq ulloq 25. juni 2018-imi kingusinnerusumiluunniit ingerlanneqarsimatillugu nalunaarutigineqarnissaat naatsorsuutigineqarpoq. Tamanna nalunaarummi tunngavigineqartumi erseqqinnerusumik nassuiarneqarpoq.

§ 66 a naapertorlugu malittarisassat atuutilersut aaqqissuussinert killeqarfinnik akimuisunut tunngatillugu sunniuteqarnissaat, alloriarnerlu siulleq OECD-mi EU-milu nunat tamat akornanni isumaqatigiissutit naapertuuttut atuutilerneranni tiguneqarpoq. Taamaaliornermi nunarsuarmi nalunaaruteqartussaataasunut periutsit pisariillisarneqarnissaat siunertaavoq.

Ilanngussaq 1

Inatsisissatut siunnersuut inatsimmut atuuttumut sanilliullugu	
<i>Oqaasertat atuuttut</i>	<i>Siunnersuut</i>
<p>§ 9. Akileraaruseriffimmi atorfillit aamma Akileraartarnermut Siunnersuisoqatigiinni ilaasortat kiisalu taakku sinniisussaat akisussaassuseqarlutik, Kalaallit Nunaannut Pinerluttulerinermik Inatsimmi § 29 malillugu paasissutissat inuit inatsisillu naapertorlugit ingerlatsiviusut aningaasarsiornermut, inuussutissarsiornermut imaluunniit inuit namminerisaminnik inooqatigiinnerannut tunngasut suliaraminnik ingerlatsinerminni tusarsimasatik susassaqqanngitsunut nipangiussilluinnartussaapput. Pisussaaffik, ikiortinut paasisimasalinnut kiisalu kikkunnulluunniit, pisortani isumaqatigiissuteqarneq naapertorlugu suliarisami kinguneranik tamakkua pillugit tusagaqarsimasunut aamma atuuppoq. Isumaqatigiissut pisortanik imaluunniit suliffeqarfimmit isumaqatigiissutaasimappat, pisortani imaluunniit suliffeqarfimmi suliarisami kinguneranik qulaani pissutsinik taaneqartunik tusagaqarsimasunut, pisussaaffik tamanut atuuppoq.</p>	<p style="text-align: center;">§ 1</p> <p>1. § 9-mi ”§ 29” uunga: ”§§ 50-54” allanngortinneqassaaq.</p>
	<p>2. § 9-p kingorna ilanngunneqassaaq: ”§ 9 a. Paasissutissanut § 69 b, nr. 1 naapertorlugu nalunaarutigineqartunut tunngatillugu, akileraartarnermullu ingerlatsiviup aningaasanik malunnaarunnaarsaasarnermut oqartussanit pissarsiaanut, § 9 naapertorlugu</p>

	<p>nipangiussisussaatitaaneq aamma inummut inatsisilluunniit isaanni inummut, paasissutissani pineqartumut atuuppoq, tamatumani pineqartumut paasissutissat ingerlateqqinnissaat pillugu sulianik ingerlatsinermi paasissutissanillu inummut tunngasunut inatsisit naapertorlugit inatsisitigut pisussaaffeqarneq apeqqutaatinnagu atuuppoq.”</p>
<p>§ 27. Ingerlatseqatigiiffinnut peqatigiiffinnullu il. il. tamakkiisumik killilimmilluunniit akileraartussaasunut akileraarutit 99 kr.-inik anneruppata, akileraarutit 6 procentimik tapiissutitut akiliutinik ilallugit akileraaruseriffimmit akiliisitsiniutigineqassapput.</p> <p>Imm. 2. Akileraarutissat tapiissutitut akiliutinik ilallit Imm. 1 malillugu ukiumi akileraarusiiffimmi ulloq 1. novembari akilerneqartussaapput, piffissaagallartillugu akiliiffissaq kingulleq tassaalluni ulloq 20. novembari. Piffissaagallartillugu akiliiffissaq kingulleq sapaataappat nalliuttuuppalluunniit imaluunniit arfininngorneruppat piffissaatitaasoq ulluinnarmut tullermut sivitsorneqassaaq. Piffissaagallartillugu akiliiffissaq kingulleq sapaataappat nalliuttuuppalluunniit imaluunniit arfininngorneruppat piffissaatitaasoq ulluinnarmut tullermut sivitsorneqassaaq.</p> <p>Imm. 3. Akileraarutit qaffanneqarnissaannik kinguneqartumik kingusinnerusukkut aalajangiineqarpat, Imm. 1 malillugu akileraarutit aningaasartaat akiliinermi ikippallaarutaasut tapiissutitut akiliutinik ilallugit qaammatip aalajangiinermi qaammatit pingasut qaangiunneranni tulliuttup aallaqqaataani akiligassanngussapput, qaammatillu</p>	<p>3. § 27 ima oqaasilerneqassaaq: ”§ 27. Ingerlatseqatigiiffinnut peqatigiiffinnullu il. il., tamakkiisumik killilimmilluunniit akileraartussaasunut, akileraarutinit akiliutaagallartut pillugit Inatsisartut inatsisaanni § 85 a naapertorlugu akileraarutinit akilerallakkanit akileraarutissat annertuneruppata, akileraaruseriffimmit akileraarutit 6 procentimik tapiissutitut akiliutinik ilallugit akiliisitsiniutigineqassapput. Tamannali taamaallaat atuutissaaq akileraarutissat 99 kr.-nit annertuneruppata.</p> <p>Imm. 2. Akileraarutissat tapiissutitut akiliutinik ilallit imm. 1 naapertorlugu ukiumi akileraarusiiffimmi ulloq 1. novembari akilerneqartussaapput, piffissaagallartillugu akiliiffissaq kingulleq tassaalluni ulloq 20. novembari. Piffissaagallartillugu akiliiffissaq kingulleq sapaataappat, nalliuttuuppat imaluunniit arfininngorneruppat piffissaatitaasoq ulluinnarmut tullermut sivitsorneqassaaq.</p> <p>Imm. 3. Akileraarutinit akiliutaagallartut akileraarummit annertuneruppata, imm. 1 takuuk, akileraarummit annertunerussutaasut kingusinnerpaamik ulloq 20. novembari utertinneqassapput. Piffissaagallartillugu akiliiffissaq kingulleq sapaataappat, nalliuttuuppat imaluunniit arfininngorneruppat piffissaatitaasoq ulluinnarmut tullermut sivitsorneqassaaq.</p>

<p>akiligassanngorfiup ulluisa 20-at tassaalluni piffissaatillugu akiliiffissaq kingullerpaq. Piffissaagallartillugu akiliiffissaq kingulleq sapaataappat nalliuttuuppalluunniit imaluunniit arfininngorneruppat piffissaatitaasoq ulluinnarmut tullermut sivitsorneqassaaq. Oqaaseqatigiit siullerniitut akileraarutit qaffanneqartut Imm. 1 malillugu tapiissutitut akiliutinik ilallit, ukiumi akileraarusiiffimmi ulloq 1. novembarimit aallartittumik qaammatit aallartinneri tamaasa 0,5 procentimik aalajangiinermik nalunaarummi ulloq tikillugu erniaqartinneqassapput.</p> <p>Imm. 4. Akileraarutissat apparneqarnerannik kinguneqartumik kingusinnerusukkut aalajangiineqarpat akileraarutit aningaasartaat akiliinermi annaarutaasimasut aalajangiinerup kingorna qaammatip ataatsip qaangiutinnginnerani 6 procentimik tapiissutitut akiliutinik ilallugit utertinneqassapput. Akileraartussaataq aningaasat utertinneqartut pillugit ukiumi akileraarusiiffimmi 1. novembarimit aallartittumik qaammatit tamaasa 0,5 procentimik aalajangiinermik nalunaarummi ulloq tikillugu erniaqartinneqassaaq. Utertitassat Imm. 3 malillugu aningaasanut akiliisitsiniutigineqarsimasunut tunngasut erniaat aatsaat naatsorsorneqalissapput ullormit akiligassanngorfigisimasamit.</p> <p>Imm. 5. Aningaasat Imm. 2-4 taaneqartut koruuninut ilivitsunut ammut akunnaallineqassapput.</p> <p>Imm. 6. Akileraaruseriffik malittarisassat Naalakkersuisunit aalajangerneqarsimasut malillugit pissutsini immikkut ittuni, ingerlatseqatigiiffinnut peqatigiiffinnullu il. il. akileraarutinik akiliisitsiniarnermi Imm. 1, 3 aamma 4-imi tapiissutitut akiliutinik ilasisoqannginnissaa.</p>	<p>Tamannali taamaallaat atuutissaq akileraarutigineqarsimasut 99 kr.-nit annertuneruppata. Akileraarummut akiliut akileraarummit 99 kr.-t ataallugit annertuneruppat, akileraarummut akiliutaavallaartoq utertillugu akilernerneqassanngilaq. Akileraarutissaviit qaangerlugit akiliutigineqarsimasunut taartisiaqartitsineqassanngilaq imaluunniit tapiissutitut akiliutinik ilassutissiisoqarnanilu.</p> <p><i>Imm. 4.</i> Kingorna aalajangiisoqarpat, akileraarutinik qaffaasoqarnissaanut kinguneqartumik, imm. 1-i naapertorlugi akileraarutit akilernikippallaarneqarnikut tapiissutitut akiliutinik ilallugit qaammatip aalajangiinermi qaammatit pingasut qaangiunneranni tulliuttup aallaqqaataani akiligassanngussapput, qaammatillu akiligassanngorfiup ulluisa 20-at tassaalluni piffissaatillugu akiliiffissaq kingullerpaajussalluni. Piffissaagallartillugu akiliiffissaq kingulleq sapaataappat, nalliuttuuppata imaluunniit arfininngorneruppat piffissaatitaasoq ulluinnarmut tullermut sivitsorneqassaaq. Oqaaseqatigiit siullerniitut akileraarutit qaffanneqartut imm. 1 naapertorlugi tapiissutitut akiliutinik ilallit, ukiumi akileraarusiiffimmi ulloq 1. novembarimit aallartittumik qaammatit aallartinneri tamaasa 0,5 procentimik aalajangiinermik nalunaarummi ulloq tikillugu erniaqartinneqassapput.</p> <p><i>Imm. 5.</i> Akileraarutissat apparneqarnerannik kinguneqartumik kingusinnerusukkut aalajangiineqarpat akileraarutit aningaasartaat akiliutaavallaarsimasut aalajangiinerup kingorna qaammatip ataatsip qaangiutinnginnerani 6 procentimik</p>
---	--

	<p>tapiissutitut akiliutinik ilallugit utertinneqassapput. Akileraartussaataq aningaasat utertinneqartut pillugit ukiumi akileraarusiiffimmi 1. novembarimit aallartittumik qaammatit tamaasa 0,5 procentimik aalajangiinermik nalunaarummi ulloq tikillugu erniaqartinneqassaaq. Utertitassat Imm. 4 naapertorlugu aningaasanut akiliisitsiniutigineqarsimasunut tunngasut erniaat aatsaat naatsorsorneqalissapput ullormit akiligassanngorfigisimasamit.</p> <p><i>Imm. 6.</i> Aningaasat Imm. 2-5 taaneqartut kr.-t ilivitsunut ammut akunnaallineqassapput.</p> <p><i>Imm. 7.</i> Akileraaruseriffik malittarisassat Naalakkersuisunit aalajangerneqarsimasut naapertorlugit pissutsini immikkut ittuni, ingerlatseqatigiiffinnut peqatigiiffinnullu il. il. akileraarutinik akiliisitsiniarnermi Imm. 1-imi aamma Imm 4-5-imi tapiissutitut akiliutinik ilasisoqannginnissaa.”</p>
<p>§ 29. Aalajangiinermi pineqartoq taana, akileraarutit sinnerinik, inaarutaasumik akileraarutissanik qaffassimasunik, aningaasarsianit akileraarutinik imaluunniit aningaasarsianit akileraarutissanik qaffassimasunik akileraaruteqanngitsooriaraluarnissaa ersarissumik aamma piviusumik tunngavilimmik aarlerinartoqartillugu, akiligassanngornerannut aamma akiliinissamut piffissarititanik § 24 imm. 3-mi aamma 5-imi, § 25 imm. 6-imi aamma § 27 imm. 2-mi aamma 3-mi aalajangerneqarsimasunit sivikinnerusunik akileraaruseriffik aalajangiisinnaavoq. Akiligassanngornerannut piffissarititat ullunit arfineq-marlunnit sivikinnerusinnaanngillat aamma</p>	<p>4. § 29-mi ”§ 27, Imm. 2 aamma 3” ima: ”§ 27, Imm. 2 aamma 4” allanngortinneqassapput.</p>

akiliinissamut piffissarititat ullunit 14-init sivikinnerusinnaangillat.	
	<p>5. § 66-ip kingorna, ilanngunneqassaaq: ”§ 66 a. Akunnermiliuttut akileraartartullu susassaqartut killeqarfiit akimorlugit aaqqissuussinerit ilisimasatik, tigummisatik nakkutilliiffigisatilluunniit pillugit paasissutissanik akileraaruseriffimmut nalunaaruteqartarnissaat pillugu malittarisassanik Naalakkersuisut aalajangersaasinnaapput. Tamatuma saniatigut akunnermiliuttoq imm. siulleq naapertorlugu malittarisassat atuutsinneqartut malillugit nalunaaruteqartussaataaniarnani qinnuteqartoq tamanna pillugu akunnermiliuttunut akileraartartulluunniit attuumassuteqartunut nalunaaruteqartassasoq pillugu malittarisassanik Naalakkersuisut aalajangersaasinnaapput.</p> <p><i>Imm. 2.</i> Akileraartarnermut ingerlatsivik killeqarfiit akimorlugit aaqqissuussinermik, imm. 1-mi malittarisassat atulersinneqartut naapertorlugit nalunaarutigineqartumut qisuariangippat, imaluunniit akileraartarnermut ingerlatsivik qallunaanit, savalimmiormiormiut imaluunniit nunani allani oqartussanit paasissutissanik pissarsisimaguni, tamanna aaqqissuussinerup atortussaananerik imaluunniit aaqqissuussinerup taassuma akileraartarnikkut suliarineqarsimaneramik akuersinermik tamanna nassataqanngilaq.”</p>
	<p>6. § 69-ip kingorna immikkoortoq V-mi ilanngunneqassaaq: ”§ 69 a. Akileraaruseriffik qinnuteqarnermi kingorna meeqqanut katissimallugulu</p>

	<p>aapparissamut akiliutit aalajangersarneqarnissaat allanngortinneqarnissaalluunniit pillugu suliat suliarineqarnissaanni atugassatut akileraartartoq pillugu aningaasaqarnikkut paasissutissanik nunani avannarlerni oqartussaasunut ingerlatitseqqissinnaavoq.”</p> <p style="text-align: center;"><i>Nunani allani oqartussanik il. il. suleqateqarneq</i></p> <p>4. § 69 b. Akileraaruseriffik, Savalimmiuni, Danmarkimi aamma nunani allani inatsisinut susassaqtartitaaffiusuni, aalajangersakkat tulliuttut naapertorlugit paasissutissanik oqartussanut piginnaasunut tunniussisarlunilu pissarsisarpoq:</p> <p>1) aningaasanik malunnarunnaarsaasarnermik aamma peqqarniisaarnianik aningaasalersuineramik pinaveersaartitsiniarnermut pineqaatissiissutinut (aningaasanik malunnarunnaarsaasarnermut malittarisassat) Kalaallit Nunaanni atuuttut pillugit kiisalu, aningaasanik malunnarunnaarsaasarnermut malittarisassat Kalaallit Nunaanni atuuttut naapertorlugit paasissutissat nalunaarutigineqarsimasunut akileraartarnermik oqartussat paasissutissanik atorsinnaanerit pillugit nunani tamani isumaqatigiissutit aamma isumaqatigiinnikkut atortuusussatut aalajangiussat attuumassuteqartunut inatsisiliorneq,</p> <p>2) akileraarutitigut suliassanik aqutsinikkut ikioqatigiinnissaq pillugu Kalaallit Nunaat Savalimmiut Danmarkillu imaluunniit nunani allani inatsisinut susassaqtartitaaffiusut akornanni suleqatigiinnissamut isumaqatigiissuteqarneq, aamma</p>
--	--

	<p>3) akileraarutigut suliassanik aqutsinikkut ikioqatigiinnissaq pillugu nunani allani isumaqatigiissutitut aalajangiussat imaluunniit aalajangersagaq alla Kalaallit Nunaannut atuuttoq.”</p>
	<p style="text-align: center;">§ 2</p> <p>Inatsisartut inatsisaat 1. januar 2022-mi atuutilissaaq.</p> <p><i>Imm. 2.</i> Akileraaruserinermik ingerlatsineq pillugu inatsimmi § 66 a naapertorlugu aalajangersakkat atuutsinneqalersut inatsimmi matumani § 1, nr. 4-mi oqaasertat malillugit killeqarfiit akiorlugit aaqqissuussinernut sunniuteqarsinnaapput, tamatumani iliuuseq siulleq ulloq 29. oktober 2014-imi kingusinnerusukkulluunniit ingerlanneqareerluni.</p>

Ilanngussaq 2**Tusarniaanermut allakkiaq**

Matumani tusarniaavigineqartut tulliuuttut oqaaseqaatissaqarnatik nalunaarput:

Ineqarnermut, Attaveqatigiinnermut Naligiissitaanermullu Naalakkersuisoqarfik, Aatsitassanut Naalakkersuisoqarfik kiisalu Isumaginninnermut Suliffeqarnermullu Naalakkersuisoqarfik.

Matumani tusarniaavigineqartut tulliuuttut siunnersuummut oqaaseqaateqarput:

Sulisitsisut (GE)

Tulliuuttuni tusarniaanermi akissutit nalinginnaasunngorlugit allanneqarput, Naalakkersuisullu oqaatigisaat *uingasunngorlugit* allanneqarlutik:

Sulisitsisut (GE)

Ingerlatseqatigiiffiit ingerlatseqatigiiffinnut akileraarutissaminnut acontomik akiliisinaanermik periarfissinneqarnerannut atatillugu, akileraarutip 6 procentinik tapeqartinnissaanut - “akiligassarsisinaanermut” – tunngavilersuut, peqatigisaanik akileraarummut tassunga acontomik akiliivallaarnermi assinganik tapeqartinginnerani paatsoornerusoq malunnarpoq.

Ingerlatseqatigiiffimmut akileraarut aatsaat suliffeqarfiup ukiumut angusaanik ilisimasaqalernermi naatsorsorneqartarpoq, taamaammallu oqaatsip “akiligassarsisinaaneeq” tapiliussamut tunngavilersuutigineqarnera eqqortuunngitsutut malunnarpoq.

Suliffeqarfiit ukiup isertitaqarfiusup ingerlanerani ingerlatseqatigiiffinnut akileraarummut acontomik akiliisinaanermik periarfissaqarnerat GE-p iluarisimaarpaa, suliffeqarfiilli ingerlatseqatigiiffinnut akileraarummik akiliivallaarnikkut “iluatsitsiniarnissaat, periarfissarlu akileraarummut acontomik akilikkap taamatut 6 procentimik tapilerneqarnissaanik tunngavilersuutitut atornera eqqunngitsuusorinarpoq.

Ernialiussallu atuuttup annertussusaa immaqa suliffeqarfiit aningaasaatiminnik “akileraarummut kontuminnut” ilisinissaannik takussutissiisinaanavoq, ernialiussallu atuuttup ingerlaannarsinnaanera ilimagineqarsinnaanngilaq.

Suliffeqarfiit aningaasaataat suliffeqarfimmi atugassiaapput, taamaammallu suliffeqarfiit iluanaarniarlutik akileraarutitut akiliivallaartalernissaannut akerliulluni.

Tusarniaanermi akissut allannguinnissamut pissutissaqartitsilinnigilaq.

Suliffeqarfiiit kisimik ukiup ingerlanerani sinneqartoorutissatut ilimagisamik qanoq annertutigiumaarnera, malitsigisaanillu ingerlatseqatigiiffinnut akileraarutissatut ilimagisap qanoq annertutiginera nalilersinnaavaat.

Suliffeqarfiiit ingerlatseqatigiiffinnut akileraarummut akiliigallarnissamut pisussaaffeqanngimmata, suliffeqarfiiit ukiumi isertitaqarfiusumi akileraarutissavimminnit annertunerusumik akiliinissamik toqqaanermikkut ernianik tapisinissaannut pitsaasumik tunngavilersuutaanngilaq.

Erniat maannakkutut aningaaserivimmiittuutitanik ernianik akiliisarnertut itsillugit, suliffeqarfiiit il.il. aningaasaatimik tiguinnariat sinneruttut akileraarutissamut akiliivallaarnikkut akileraaruserinermut ingerlatsivimmut inissinnissaannut pilerinarsereersinnaapput. Tamannalu annertunerusumik akileraarutinut acontomik akiliutaavallaartut (akileraarutaagallartut) 6 procentimik ernialerneqarneranni atuutissaaq.

Killeqarfinnik akimuisunik malittarisassiornissamik aaqqissuussinissamik siunertaqarneq GE-p ataatsimut isigalugu iluarisimaarppaa. Den Europæiske Unionip malittarisassai (DAC6) kiisalu OECD-p periutsinut malittarisassai “Kalaallit Nunaanni pissutsinut” nalimmassarneqassasut, siunnersuummut nassuiaatini atuarneqarsinnaavoq. Tamatumalu kinguneriumaagai malittarisassani siunnersuummi § 66 a-mi siunnersuut naapertorlugu Naalakkersuisut siunnersuutigisinnaasaanni takuneqarsinnaassaap.

Tassunga atatillugu inatsisiliortut tungaannit ilisarnaatinut 26-nut, immikkoortuni pingaarnerni tallimani ilaatinneqartuni, qaqugukkut nalunaartussaarnermik sukumiisunngortitsisunik isummernissaq GE-p ujartorppaa.

Ilisarnaatit taakku “Kalaallit Nunaanni pissutsinut nalimmassarneqassappata” § 66 a il.il. atulersinneqarnerani kalaallit suliffeqarfiisa sunik ilimagisaqarsinnaanermik nunatsinnut sanilliullugu eqqortumik paasisaqarnissaannut pingaaruteqarluinnartussaapput.

Tusarniaanermi akissut allannguinnissamut pissutissaqartitsilinnigilaq.

Siunnersuummi § 66 a-p malitsigisaanik suliarineqarsinnaasumik nalunaarusiorneq suliaqarneq suli aallartinngilaq. Taamaammat Kalaallit Nunaanni pissutsinut tunngatillugu malittarisassanik nalimmassaanissap qanorpiaq ilusilerneqarnissaa maannakkuugallartooq oqaaseqarfigineqarsinnaanngilaq.

Nalunaaruteqarnissamut killiliussanik qaangiineq akiliisitsinermik kinguneqartarpoq. Siunnersuummut nassuiaatini akiliisitsinerit akunnermiliuttut unioqquitsineranni “50.000 kr.-

t ataallugit” annertussuseqannginnissaannik, kiisalu akileraartussaataasup unioqquitsinerani 25.000 kr-nik annertussuseqartutut inissinneqarput.

Akiliisitsinerit “nalunaaruteqarnissamik piffissaliussanik unioqquitsinermik” patsiseqartumik pisarmata, “pissutsit qasukkaallatsitsinnaasut”, akiligassap annertussusaanik appartitsineri tunngavigineqarsinnaasut, immaqaluunniit akiliisitsinnginnermik kinguneqarsinnaasut, allaffissornermili sillimmartaarfigineqareertariaqarput.

Siunnersuummut nassuiaatini qaqugukkut pisuni ataasiakkaani akiliisitsissutissap annertussusaanik naliliinissaq – allaffissornikkut imaluunniit akiligassiissutit eqqartuussivinnut aatsaat saqqummiunneqarneranni - pissanersoq taaneqanngimmat, tamanna oqaatigineqarpoq.

Suliffeqarfiit eqqartuussivimmi suliassamik aallartitsinissamik pinngitsaalineqartariaqanngillat, tassani allaffissornermik suliaqartunit akiliisitsinerit “nammineerlutik” pisarmata – aamma annertussusaat eqqarsaatigalugu.

Tusarniaanermi akissut allannguinnissamut pissutissaqartitsilinngilaq.

Allaffissornikkut pinerluuteqarsimanermillu suliiani akiliisitsinerit eqqartuussivinni suliarineqartut, akiligassiissutit annertussusilerneqarneranni qasukkaasinnaanermik pinngitsuutitsinnaanermilluunniit, Kalaallit Nunaanni Pinerluttulerinermik inatsimmiittunik, isiginninniartussaapput, tassani ingammik inatsimmi kapitali 24 aamma § 123. Pisuni taakkunani tamani kinguneqartitsinissamik naliliineq suliata ataasiakkaat aallaavigalugit pisassapput.

Allaffissornikkut akiliisitsinerit pineqartillugit suliffeqarfiit akiligassiissutinik isumaqatiginngisaminnik akiliiumanatik eqqartuussivilersuussinissamut pinngitsaalineqanngillat.

Allaffissornikkut akiliisitsinerit akiliisussanngortinneqartup inatsisinik unioqquitsinermik suliata, akiliisinneqartup akiligassiissummik akuersineratigut (aalajangereratigut) kiisalu akiligassiissutip annertussusianik akuersineratigut, pinerluttulerinikkut eqqartuussivimmi malersorneqartussanngortippagit akilinnginneqarsinnaapput.

Suliffeqarfik il.il. akiliisitsinerup imarisaanik isumaqataanngippat, suliffeqarfiup akiliisitsineq atsiunngiinnarsinnaavaa. Taamaattoqartillugu oqartussaasut pinerluttulerinermi inatsisitigut malersuinissaq siunertaralugu, suliamik politiinut unnerluutiginnissapput.